

॥ श्री ॥

आदुपुराण

सोनी हरिचंद भजनावली



यह पुस्तक

सोनी हरिचंद सिरोही नगरवालों ने बनाके
“धी एडवर्ड ” प्रिन्टींग प्रेस, घीकांटा,
अहमदाबाद संवत १९८१ में छपवाया

प्रथम आवृत्ति : १०००



आवृत्ति : चौदहवीं कॉपी : १०००

संवत २०६७

मुद्रक : देव ऑफसेट, अहमदाबाद



॥ श्री नकलंगाय नम ॥

सूचना

श्रीयुत चौहान वंश, नख मादरेसा, हीरासिंहजी नंदन महाराज श्री अनोपस्वामीजी के परम शिष्य सोनी हरिचन्द द्वारा रचित ज्ञान, परम भक्ति का सार, भजन-भाव के उपदेश, मुख्य पुरुषों के हृदय में धारण करने का मुगती स्वरूपी अमूल्य मोतियों का हार हैं जिसमें - गुरु महिमा, आरब-लीला, सुरता, आरोधी, आगम प्रमाण, पृथ्वी प्रमाण, कूदरत पंछी, सरबंग और जोगाराम इत्यादि भजन राग सहित वर्णित है ।

आपका सेवक

सोनी हरिचंद

सिरोही नगर (राजपूताना)

विषय सूचि

क्रम सं.	भजन का नाम	पृष्ठ संख्या
1.	कुण्डलिया, भजन	5
2.	साखी	6
3.	राग-जोगाराम भजन, राग वेराग	7 से 11
4.	गुरु महिमा, कुंडलिया	12 से 13
5.	अथ आरब लीला	14 से 16
6.	राग मलार सुरतारो भजन	17
7.	राग मलार भाटी भजन	18
8.	राग मलार नाटक भजन	19
9.	राग मलार आरती भजन	20
10.	भजन आरोधीप्रमाण सारंग भजन 1-4	21 से 24
11.	राग सारंग आगम प्रमाण भजन 1-4	25 से 28
12.	राग तेलंग कामोद भजन वाणी 1-4	29 से 32
13.	राग-मांड पृथ्वी प्रमाण भजन 1-8	33 से 40
14.	राग मलार-भजनवाणी मोरीया इत्यादि 1-5	41 से 45
15.	राग देश गणपतजी, पण्डतजी, साधुजी, आलमजी भजन	46 से 49
16.	राग बरहन जोगाराम भजन वाणी 1-4	50 से 53
17.	राग पीलू अजरी सरबंग भजन 1-5	54 से 58
18.	राग रासड़ा भजन 1-8	59 से 66
19.	राग खमास गुणेश इत्यादि भजन 1-7	67 से 73
20.	राग देशी भजन 1-2	74 से 75
21.	राग विहाग भजन 1-4	76 से 79

कुण्डलिया

संवत उगनीस मास हतो, जेट सुदी पांचम ।
 वर्ष हतो एकावनो, जदी लगाई गम ॥
 जदी लगाई गम, छावणी एरनपुर की ।
 मिलिया मोहे अनोप, बात कहते गुरु हर की ॥
 कहे सोनी हरिचन्द, सुमरते अपणा दम ।
 संवत उगनीस मास हतो, जेट सुदी पांचम ॥

भजन

वेपारी जीवड़ा समझे ने रेणां रे... (टेर)
 धान जी वेचे जालि सुन जी वेचे,(२) वेचे है कपड़ों री गोठों रे ।
 वेपारी जीवड़ा समझे ने रेणां रे... (टेर)
 हीरा जी वेचे जालि पनाजी वेचे,(२) वेचे है माणक मोती रे ।
 वेपारी जीवड़ा समझे ने रेणां रे... (टेर)
 लख तो चौरासी जालिये कुंडियां बनाई,(२) करे है होम ने जाप रे ।
 वेपारी जीवड़ा समझे ने रेणां रे... (टेर)
 गायों रा होम करे, मांदगी चलावे,(२) मारे है जीवाजून सारी रे ।
 वेपारी जीवड़ा समझे ने रेणां रे... (टेर)
 मनखो रो होम करे, प्लेग चलावे,(२) मारे है सारोई संसारो रे ।
 वेपारी जीवड़ा समझे ने रेणां रे... (टेर)
 काचा जी तोड़े जाली, पाका जी तोड़े,(२) तोड़े है गोड़ नीयारु रे ।
 वेपारी जीवड़ा समझे ने रेणां रे... (टेर)
 देशां जी जावे जाली, परदेश जावे,(२) जाए जाए ने कटे जायो रे ।
 वेपारी जीवड़ा समझे ने रेणां रे... (टेर)
 दोय कर जोड़ अनोपदास बोले,(२) चार जुगो री एतो बातों रे ।
 वेपारी जीवड़ा समझे ने रेणां रे... (टेर)

साखी

साद-साद नर बहोत केवावे, संत की राय कोई विरला पावे ।
जो कोई पावे संत की राय, तो मुख से गुंगा हो जावे ॥
कहे अनोप सुनो भाई संतों, ऐसा साधु मेरे मन भावे ॥
होवे ब्रह्मा ज्ञानी, कथे ब्रह्माण्ड खंड ज्ञाना ।
ज्ञान कथने से क्या फल पावे, नहीं पावे नाम निशाणा ॥
कहे अनोप सुनो भाई साधु, खाली क्यु करणा ऐसाणा ॥
कपर फकीरी सब कोई लेवे, ज्ञान फकीरी लेवे नहीं कोई ।
जो कोई लेवे ज्ञान फकीरी, ज्यांरे धड़ पर शीश न होई ॥
कहे अनोप सुनो भाई साधु, सुख तो ज्यांरे घट में होई ॥
थोथा ज्ञान दाए नहीं आवे, जैसे वन में धेनु चरावे ।
दिन भर दिन भर अपनी चहावे, सांझ पड़े लकड़ी ले अकेला घर आवे ॥
कहे अनोप सुनो भाई साधु, झूठा झगड़ा दाए नहीं आवे ॥



राग जोगाराम भजन

सतगुरु मेरा मैं सतगुरु का तोड़ी भरम की ताटी,
शशि और भांण एकण घर प्रकाशा, वटे मारी सुरता समाई ॥
सतगुरु मेरा मैं सतगुरु का..... । टेरे ।

भजनरी यूं पारखर करिये, दरसे बाहर भीतर मांय । (२)
एक-एक में दमका पसारा,(२) वटे मारी सुरता ललचाई ॥
सतगुरु मेरा मैं सतगुरु का..... । टेरे ।

इंगला-पीगला सुखमण नाड़ी, तीनोंई एकण घर जाई ।(२)
सुखमण घाटी अमीरस वरसे,(२) कोई पीए मारा गुरुजी रा प्यासी ॥
सतगुरु मेरा मैं सतगुरु का..... । टेरे ।

सोवन शिखर घर वाजां बाजे, जाणे कोई जानन हार ।(२)
मुरली वेण सतारा जी बाजे,(२) बाजे अणहद रणुकारा ॥
सतगुरु मेरा मैं सतगुरु का..... । टेरे ।

गगन मंडल घर बंगला बणिया धनरे कारीगर सांई ।(२)
भवानीनाथ चरणे अनोपदास वणजे(२) वणज करे सो सदा सवाई ॥
सतगुरु मेरा मैं सतगुरु का तोड़ी भरम की ताटी ॥



राग जोगाराम

हरदम हरिगुण गाता मेरे दाता, लहेर होय जब आता ॥ टेर ॥

जल की बुन्द का बणिया पींजरा, सपतदीप आकाशा । (२)

नव सो नदियां चले नाभ से, (२)

चार ज्योत प्रकाशा मेरे दाता लहेर होय जब आता ॥

हरदम हरिगुण.....

तूं मेरा दाता मैं तेरा आशक, और वचन को चाहता । (२)

भूख प्यास की खबर आपको, (२)

आप देता जब खाता मेरे दाता लहेर होय जब आता ॥

हरदम हरिगुण.....

सर-चौगान में भट्टी चलाई, भरीया सुखमण माटा । (२)

पीवत-पीवत मारो जनम सुधार्यो, (२)

मतवाला साधु केवाता मेरे दाता लहेर होय जब आता ॥

हरदम हरिगुण.....

पत्ती नहीं तोड़ूं पत्थर नहीं पुजू, झूटा देव नहीं मनाता । (२)

रोम-रोम मांय बसे निरंजन, (२)

वोही वाट में जाता मेरे दाता लहेर होय जब आता ॥

हरदम हरिगुण.....

जोगी नहीं होवुं झटा नहीं बढावुं, वचन पकड़िया साचा । (२)

दोय कर जोड़ अनोपदास बोलिया, (२)

अखंड ज्योत में समाता मेरे दाता लहेर होय जब आता ॥

हरदम हरिगुण.....

राग वेराग

गवरीरा नन्द गुणेशा ने समरु, हिरदा में हरिगुण गावुं मेरे दाता ॥ (२)

पापी माणस मारी नजरे नहीं चाहु
शाह माणस मारी नजरे नहीं चाहु ॥ टेर ॥

वसता खेड़ा उजड़ कीदा, उजड़ फेर बसाया मेरे दाता ॥ (२)

पापी माणस मारी नजरे नहीं चाहु
शाह माणस मारी नजरे नहीं चाहु ॥ गवरीरा नन्द

तल भर ताला राई भर कुंची, सतगुरु खोल बताया मेरे दाता ॥ (२)

पापी माणस मारी नजरे नहीं चाहु
शाह माणस मारी नजरे नहीं चाहु ॥ गवरीरा नन्द

खुल गया ताला हुआ उजियाला, हिरलां से जोत सवाया मेरे दाता ॥ (२)

पापी माणस मारी नजरे नहीं चाहु
शाह माणस मारी नजरे नहीं चाहु ॥ गवरीरा नन्द

दोय कर जोड़ अनोपदास बोले, धाया जैसा फल पाया मेरे दाता ॥ (२)

पापी माणस मारी नजरे नहीं चाहु
शाह माणस मारी नजरे नहीं चाहु ॥ गवरीरा नन्द



जोगाराम भजन

दस अवतार ज्यारे एक मेरे दाता, मारम विरला जाणी है ।
 सब सृष्टि में एक मेरे मालिक, मारम विरला जाणी है ॥ टेर ॥
 हिन्दू कहते राम-राम, मुसलमान कहे मेरी है । (२)
 नहीं है मेरी नहीं है तेरी, (२) जाणे जिनकी शेरी है ॥ दस अवतार ज्यारे.....
 नाभ कमल में रहत हमारी, बंक-नाल उलटाणी है । (२)
 स्वासे स्वास भजन की माला, (२) आ हर की ओलख्राणी है ॥ दस अवतार ज्यारे....
 जद सतगुरु मौपर कृपा कीनी, जदुणी वात विचारी है । (२)
 मोर मुगट पर हुआ प्रकाशा, (२) आ हर की ओलख्राणी है ॥ दस अवतार ज्यारे.....
 भवानीनाथ गुरु पूरण मलिया, दी हर की ओलख्राणी है । (२)
 दोए कर जोड़ अनोपदास बोले, (२) अगम निगम ओलख्राणी है ॥ दस अवतार ज्यारे...

भजन

मुं तो थाने समरु जल मुरारी ओ २, जल री कमाई रा लेउ वारणाजी । २
 मुं तो थाने समरु अगन मुरारी ओ २, अगनी री कमाई रा लेउ वारणाजी । २
 मुं तो थाने समरु धरणी मुरारी ओ २, धरणी री कमाई रा लेउ वारणाजी । २
 मुं तो थाने समरु अनाज मुरारी ओ २, अनाज री कमाई रा लेउ वारणाजी । २
 मुं तो थाने समरु दरख्रतो मुरारी ओ २, दरख्रतां री कमाई रा लेउ वारणाजी । २
 मुं तो थाने समरु कपास मुरारी ओ २, कपास री कमाई रा लेउ वारणाजी । २
 मुं तो थाने समरु गाय मुरारी ओ २, गायों री कमाई रा लेउ वारणाजी । २
 मुं तो थाने समरु भेसिया मुरारी ओ २, भेसियां री कमाई रा लेउ वारणाजी । २
 मुं तो थाने समरु घेटा मुरारी ओ २, घेटां री कमाई रा लेउ वारणाजी । २
 मुं तो थाने समरु बकरा मुरारी ओ २, बकरां री कमाई रा लेउ वारणाजी । २
 मुं तो थाने समरु ऊंट मुरारी ओ २, ऊंटों री कमाई रा लेउ वारणाजी । २
 मुं तो थाने समरु हस्ती मुरारी ओ २, हस्तीयां री कमाई रा लेउ वारणाजी । २
 मुं तो थाने समरु घोड़ा मुरारी ओ २, घोड़ों री कमाई रा लेउ वारणाजी । २
 मुं तो थाने समरु गधा मुरारी ओ २, गधों री कमाई रा लेउ वारणाजी । २
 मुं तो थाने समरु मानव मुरारी ओ २, मानवों री कमाई रा लेउ वारणाजी । २
 मुं तो थाने समरु जीवाजून मुरारी ओ २, जीवाजून री कमाई रा लेउ वारणाजी । २
 दोय कर जोड़ अनोपदास बोलिया २, सतगुरु स्वामी थोरा लेउ वारणाजी । २

भजन

आद विचारों भाईयों भजन पेहचाणो,
जद पावो राम हमारो रे हां जी (२) ॥ टेर ॥

साध हुआ ने भाईयों समझे नहीं जाणे,
झूटी झूटी झगड़ मचावे रे हां जी... ॥ (२)
अकलौरा आंधळा फरे भटकता, हीरा दूजो कने परखावे रे हां जी...। (२)

साचा साधु भाई साच बतावे,
कुरसों रे मन नहीं भावे रे हां जी... ॥ (२)
अटे जो भूला भाई आगे ही भूला, भूला ने राम क्यों मिलावे रे हां जी... । (२)

आद विचारों भाईयों भजन.....

अपणा जो पेट में खदिया जो लागी,
वण रे खायो केम जावे रे हां जी...॥ (२)
ज्ञान सुणियासु भाई भूख नहीं जावे, भूख तो खायो सूंही जावे रे हां जी... । (२)

आद विचारों भाईयों भजन.....

जनम-मरणरी जो खबर नहीं जाणे,
क्यों आया खाली मनख्र जमार रे हां जी... ॥ (२)
जीवतो तको तो भाईयो मुगती नहीं पाई, मुओ पुठी कण घर जावो रे हां जी...। (२)

आद विचारों भाईयों भजन.....

दोय कर जोड़ अनोपदास बोले,
मलियोंरा राम क्यों गमावो रे हां जी... ॥ (२)
मनकी भरमना छोड़ दो जगत में, पद पावो निर्वाणा रे हां जी... । (२)

आद विचारों भाईयों भजन.....



॥ श्री गणेशाय नम ॥

अथ गुरु महिमा लिख्यते

राग धुन चौपाई ।

सब संतों मिल सभा बनाई, हरिचन्द कहे सुनोरे भाई ।
 पूरी प्रीत राम से राख्रो, मारो काल अमीरस चाख्रो ॥
 साचा वचन शरीरां रखना, झूठा वचन कछु नहीं भखना ।
 तंत वचन की शोभा भारी, पूजो गुरु समरणा धारी ॥
 गुरु समरण की गीता गावे, जिनके पिंजर वचन समावे ।
 गुरु करो अमीरस पावो, दल दरियावां निर्भय न्हावो ॥
 सतरी बात जुगा में कीजे, गुरु समरण में अन्तर दीजे ।
 महिमा करे गुरु को पूजे, दिल अन्तर में दीपक सूझे ॥
 देख्रो गुरु सूरत कर साती, गुरु दीपक बिन कोरी बाती ।
 हरिचन्द कहे सुनो सब माया, गुरु बिन मुक्ति कोई नहीं पाया ॥
 सतगुरु वचन सदा सुखकारी, देख्रो सतगुरु ब्रह्म विचारी ।
 अगम निगम की वाणी गावो, सतगुरु बिना भेद नहीं पावो ॥
 गुरु सरवर जुग मछिया सारा, गुरु बिन दिल में घोर अंधारा ।
 सतगुरु वचन जोग सेलांणी, उल्टा भोम चढावत पाणी ॥
 सतगुरु चन्दा सतगुरु भांण, उल्टा गुरु चलावत बाण ।
 सतगुरु मिल्या पाया नेसा, बिन सतगुरु तो पत्थर जैसा ॥
 सतगुरु पारस सतगुरु कंचन, सतगुरु वचन जीव का मंजन ।
 सतगुरु सतगुरु हरदम ध्यावो, गुरु वचनों से मुक्ति पावो ॥
 सतगुरु ने चौरासी मेटा, पवना जाय भवन में बैटा ।
 ऐसा गुरु अमीरस पाया, दिल पिंजर का भेद बताया ॥

अनोपस्वामी सतगुरु पाया, सोनी हरिचन्द शीश नमाया ।
हरिचन्द कहे सुनो सब माया, गुरु बिन मुक्ति कोई नहीं पाया ॥
सतगुरु कुंची जग सब ताला, दे कुंची तब होवे उजियाला ।
सुरती जाय भवन में लागे, दुरमती दुविधा भय जद भागे ॥
चेला इन्दर रूपी रहवे, सतगुरु वचन उसी को देवे ।
सतगुरु वचन हिरदे में राखे, वो चेला अमर फल चाखे ॥
अमर बीज गुरु ने दीना, चेला शीश नमावे लीना ।
बोयो बीज प्रेम से ऊँगे, सतगुरु मिले शिखर गढ़ पूगे ॥
सतगुरु मिलिया सोजी पाई, सतगुरु भेदु अगम बताई ।
सतगुरु वचन प्रेम कर ध्यावो, पांचों ही उलट एकण घर लावो ॥
गुरु समरण की सेवा कीजे, हृदय कमल में सुरती दीजे ।
खण्ड ब्रह्मांड की लीला भारी, पूजो गुरु समरणा धारी ॥
अनोपस्वामी सतगुरु पाया, सोनी हरिचन्द शीश नमाया ।
हरिचन्द कहे सुनो सब माया, गुरु बिन मुक्ति कोई नहीं पाया ॥

कुण्डलिया

महिमा कही गुरु देव की, दिशे अपरम-पार ।
सतगुरु बैठे आप में, देखो दसवे द्वार ॥
देखो दसवे द्वार, सुन में बाग लगावो ।
जोवे फल की आस, प्रेम का पानी पावो ॥
कहे सोनी हरिचन्द, देव दर्शन की टेमा ।
कटे कर्म का पाप, देखलो गुरु की महिमा ॥



अथ आरब लीला लिख्यते

ओ३म गुरुजी आद बीज तो जल बोलिये, जल में ज्योत बोलिये, ज्योत में पवन बोलिये, तीन गुणों का परिब्रह्म महावजर का बोलिये, परिब्रह्म का पंड बोलिये, पंड सरूप पृथ्वी बोलिये, पृथ्वी के द्वार बोलिये, दोय तो नेत्र बोलिये, दोय तो नासिका के सुर बोलिये, दोय तो कान बोलिये, एक तो मुख बोलिये, एक तो इन्द्री बोलिये, एक तो गुदा बोलिये, नव जो द्वार बोलिये, नव द्वार का नव खंड बोलिये, दसमा तो शीश बोलिये, पीठ मस्तक का दसवां ब्रह्माण्ड बोलिये, शरीर तो महा वजर का बोलिये, रूप तो कासब का बोलिये, आहार तो जल का बोलिये, पांच तो चार बोलिये, गर्भ जो वारता बोलिये, पाषाण पर्वत तो हाड़ बोलिये, नव सौ नदियां तो नाड़ी बोलिये, गिरिमेर तो नाभ बोलिये, गिरिमेर के दोली दोय फणी नदी बोलिये, पूरब पश्चिम उत्तर दक्षिण चार जो खूंट बोलिये, दरियाव जो ओज बोलिये, सात जो कमल बोलिये, सात कमल का सात दीप बोलिये, चंद्र-भांण जो दम की ज्योत बोलिये, पवन जो स्वास बोलिये, तारा मंडल जो रतन प्रकाश बोलिये, गुण तो तीन बोलिये, रजो गुण में पवन बोलिये, तमो गुण में अगन बोलिये, सतो गुण में जल बोलिये, जल के रूप तो चार बोलिये, एक जल रूप तो आप बोलिये, एक जल रूप तो चंद्र में बोलिये, एक जल रूप तो जड़ में बोलिये, एक जल रूप तो चेतन में बोलिये, चार रूप तो जल का बोलिये, चार रूप तो अग्नि का बोलिये, एक अगन रूप तो पत्थर में बोलिये, एक अगन रूप तो भांण में बोलिये, एक अगन रूप तो जड़ में बोलिये, एक अगन रूप तो चेतन में बोलिये, चार रूप तो अगन का बोलिये,

चार रूप तो पवन का बोलिये, एक पवन रूप तो चंद्र में बोलिये, एक पवन रूप भांग में बोलिये, एक पवन रूप जड़ में बोलिये, एक पवन रूप चेतन में बोलिये, चार रूप तो पवन का बोलिये, द्वादश कला बोलिये, महा कुदरती बोलिये, गुण तो तीन बोलिये, महा वजर का बोलिये, परिब्रह्मा तो एक बोलिये, तत्व तो पांच बोलिये, आप तत्व तो सफेद बोलिये, पृथ्वी तत्व तो पीला बोलिये, वायु तत्व तो हरिया बोलिये, तेज तत्व तो लाल बोलिये, आकाश तत्व तो श्याम बोलिये, मिट्टी तो पांच बोलिये, आप तत्व में सफेद मिट्टी बोलिये, पृथ्वी तत्व में पीली मिट्टी बोलिये, वायु तत्व में हरी मिट्टी बोलिये, तेज तत्व में लाल मिट्टी बोलिये, आकाश तत्व में श्याम मिट्टी बोलिये, मिट्टी तो पांच सम्पूर्ण बोलिये, धातु तो पांच बोलिये, आप तत्व में सफेद रंग चांदी बोलिये, पृथ्वी तत्व में पीला रंग कंचन बोलिये, वायु तत्व में हरा रंग रांगा सीसा जसद बोलिये, तेज तत्व में लाल रंग तांबा बोलिये, आकाश तत्व में श्याम रंग लोहा बोलिये, धातु तो पांच सम्पूर्ण बोलिये, गर्भ आकार तो एक बोलिये, आरब तो दो बोलिये, एक तो लील बोलिये, एक तो अलील बोलिये, लील तो जड़ में बोलिये, अलील तो चेतन में बोलिये, चेतन की दो ख्राण बोलिये, एक तो इंड ख्राण बोलिये, एक तो जर ख्राण बोलिये, लील तरवर की जड़ ख्राण बोलिये, ख्राण तो तीन बोलिये, आरब तो दो बोलिये, गर्भ आकार तो एक बोलिये, तरवरां का रंग बोलिये, आप तत्व में सफेद रंग रुई बोलिये, पृथ्वी तत्व में पीला रंग केसर हल्दी बोलिये, वायु तत्व में हरा रंग पान बोलिये, तेज तत्व में लाल रंग कसुंबा मेहंदी बोलिये, आकाश तत्व में श्याम रंग गली का बोलिये, पांच रंग तरवरां का सम्पूर्ण बोलिये, पांच मिट्टी की चेतन आत्मा बोलिये,

आप तत्व में सफेद रंग हाड़ बोलिये, पृथ्वी तत्व में पीला रंग खालड़ी बोलिये, वायु तत्व में हरा रंग नाड़ी बोलिये, तेज तत्व में लाल रंग खून बोलिये, आकाश तत्व में श्याम रंग मस्तक का बोलिये, पांच मिट्टी की चेतन आत्मा बोलिये, सर्व का मूल बीज तो जल, अगन और पवन बोलिये, बीजग से करके लख चौरासी जीवाजून का चेतन कुल प्रगट हुआ, बीजग से करके अटारह करोड़ वनस्पति का कुल प्रगट हुआ, बीजग से कुल हुआ, बीजग नहीं तो कुल भी नहीं, बीजग तो अमर है, विस्तार तो बीजग का है, शरीर तो कच्चा है, पवन तो साख्र है, लख चौरासी जीवाजून में बड़ा कुल मानव का बोलिये, ज्यां में तीन पुरुष महा क्रांतिवान प्रगट हुए, ब्रह्मा, विष्णु, महेश ज्यांकी माता तो सागरीजी बोलिये, पिता तो ओमकारजी बोलिये, तीन पुरुष के तीन जोग महासति बोलिये, ब्रह्माजी के सावित्रीजी महासति बोलिये, विष्णुजी के लक्ष्मीजी महासति बोलिये, शिवजी के गौरा पार्वतीजी महासति बोलिये, कला तो अकल बोलिये, नाम तो अमर बोलिये, शरीर तो कच्चा बोलिये, पाठ तो पृथ्वी का बोलिये, ज्योत तो अखण्ड बोलिये, धर्म तो सत बोलिये, देखत जो ज्ञान बोलिये, गुप्त जो चोरी बोलिये, ऐता पृथ्वी पाठ आरब लीला का प्रसंग संपूर्ण भया, श्री अनोपस्वामीजी के चरण में सोनी हरिचन्द भाख्या श्री नकलंग अवतार साख्या ।



राग मलार सुरतारो भजन-१

सुरता ब्रह्म पती ओ पूरा सेविया, पहेला चालंती चाल कुचाल ।
सुरता रंग तो करती पण रमज नही, तुं तो रम झम खेलेली ख्याल ॥
सुरता वर तो पायो ए सुरता सुन्दरी ॥ टेर ॥

सुरता चरणा पेरिया ओ थे तो शोभता, थांरी नेतर दरशे ओ लाल । (२)
सुरता दर्पण जोएलो दीदार में, पछे नेणों में काजल घाल ॥ (२)
सुरता ब्रह्म पती ओ पूरा सेविया.....

वारी सुरता चाल चाले ओ हंसा तणी, तूं तो बोले है कोयल सवाल । (२)
सुरता ब्रह्म रिझावण चालियां, थारां पावों में नेवर घाल ॥ (२)
सुरता ब्रह्म पती ओ पूरा सेविया.....

वारी सुरता सुतों रा कंत चेताविया, जागो ज्योति सरूप जलाल । (२)
देवा कलंक उतारो कुआरी तणों, मैं तो हाजिर ऊभी हूं हाल ॥ (२)
सुरता ब्रह्म पती ओ पूरा सेविया.....

सुरता ब्रह्म सुरत दोए भेला हुआ, वटे पहेरी वचनांरी वरमाल । (२)
सुरता शशी और भांण दोनों साख्रियां, लागो त्रवणी ऊपर ताल ॥ (२)
सुरता ब्रह्म पती ओ पूरा सेविया.....

सुरता सोवन शिखर तो सवरी रची, वटे बाजे है मरदंग ताल । (२)
सुरता लोचन करीओ वदावणां, वटे भर-भर मोतियो रों थाल ॥ (२)
सुरता ब्रह्म पती ओ पूरा सेविया.....

वारी सुरता मन तो जोषी ओ मंतर भणे, वटे लीदो हथलेवो ओ झाल । (२)
सुरता परणे आया ओ सुन महल में, ज्यांरे झिल-मिल जले ओ मसाल ॥ (२)
सुरता ब्रह्म पती ओ पूरा सेविया.....

वारी सुरता आप अनोप लगन दिया, म्हाने सुन में बताई ओ चाल । (२)
सुरता सोनी ओ हरिचन्द रंग रमे, जटे खेलाया लाल गुलाल ॥ (२)
सुरता ब्रह्म पती ओ पूरा सेविया.....

राग मलार भाटी भजन-२

सख्रीए पीये प्याला ओ कंथजी, थे तो पाया है दे दे ओ रंग ।
 सख्रीए आप अधर रंग रम रही, थारा मन मांय बहोत निशंख ॥
 सख्रीए पति ही रिझायो है पदमणी ॥ टेर ॥

वारी सख्रीए नाभी भीतर में भट्टी जले, ज्यां में रचीया है पांचों ही रंग । (२)
 सख्रीए चेती अगन भट्टी ऊकळे, ज्यां में जोएलो जंतर को ओ रंग ॥ (२)
 सख्रीए पीये प्याला ओ कंथजी.....

सख्रीए सुखमण धार प्यालो भरे, ज्यां में जोयलो अमी ओ रस रंग । (२)
 सख्रीए लिया प्याला ओ प्रेम से, पायो आप तत्व सद रंग ॥ (२)
 सख्रीए पीये प्याला ओ कंथजी.....

सख्रीए मिटरस फिका ओ चरपरा, एतो खटरस खाराओ रंग । (२)
 सख्रीए पांचों प्याला ओ भर लिया, दूजो पायो केसरियो ओ रंग ॥ (२)
 सख्रीए पीये प्याला ओ कंथजी.....

सख्रीए उरद प्यालो अदर लियो, तीजो हरियो हरी ओ रस रंग । (२)
 सख्रीए अगर आसण पर आविया, वटे चौथो प्यालो सुरंग ॥ (२)
 सख्रीए पीये प्याला ओ कंथजी.....

सख्रीए श्याम प्यालो शिखर चढे, ज्यां में अगम असमाना ओ रंग । (२)
 सख्रीए ब्रह्मासुरत दोय भेला पिए, ज्यांरे रोज-रोज लागे ओ रंग ॥ (२)
 सख्रीए पीये प्याला ओ कंथजी.....

सख्रीए मतवालो मांडियो महल में, ज्यांरे चढीयो सवायो ओ रंग । (२)
 सख्रीए अणबे वाजा ओ ज्यांरे वाजीया, परची पांच ज्योत पचरंग ॥ (२)
 सख्रीए पीये प्याला ओ कंथजी.....

सख्रीए आप अनोप उलट पिया, ज्यांरे वंकनाल रस रंग । (२)
 सख्रीए सोनी ओ हरिचन्द भर पीया, ज्यांरे आद अथंग जल रंग ॥ (२)
 सख्रीए पीये प्याला ओ कंथजी.....

राग मलार नाटक भजन-३

देवा उलट नाभी ओ चढ़ी वंक पे, ज्यां में देख नुरत को ओ रंग ।
 देवा सुरत नाटक मांही रम रही, जणे फूल पहरियाओ पचरंग ॥
 सुरता रंग से रिझायो है राजवी ॥ टेर ॥

देवा नाटक देखण चाली सुरत को, जणे वश कीना मन ओ तुरंग । (२)
 देवा कर असवारी ओ समरिया, दोनों गणपत ओ बजरंग ॥ (२)
 देवा उलट नाभी ओ चढ़ी वंक पे

देवा नव सौ चिराग ओ संग में, ज्यांरे झलमल जोत झरंग । (२)
 देवा ताल मृदंग बाजे बंसरी, गहरी घोर पड़े ओ घणी रंग ॥ (२)
 देवा उलट नाभी ओ चढ़ी वंक पे

देवा शंख पखावल बज रहा, बाजे घड़ियाला डेरु डरंग । (२)
 देवा सरस्वती वचनों को सिद्ध करे, आगे अणबे गजल गावे रंग ॥ (२)
 देवा उलट नाभी ओ चढ़ी वंक पे

देवा निर्भय नकीम पुकारिया, वटे त्रवणी चढ़ायो तुरंग । (२)
 देवा सुखमण सैज बिछाविया, ज्यांरे फरकत नेजा फरंग ॥ (२)
 देवा उलट नाभी ओ चढ़ी वंक पे

देवा ब्रह्म नाटक पर रीझीया, सुरता गावे राग मद रंग । (२)
 देवा सुरत ब्रह्मजी को मोहे लिया, ज्यांरे लिपट रही ओ लग रंग ॥ (२)
 देवा उलट नाभी ओ चढ़ी वंक पे

देवा अधर दली से आसन किया, ज्यांरे नित-नित खेले ओ रंग । (२)
 देवा सुन में रचाई है रोशनी, ज्यांरे आठ पहोर ऊसरंग ॥ (२)
 देवा उलट नाभी ओ चढ़ी वंक पे

देवा अनोपदास गुरु भेटिया, ज्यांरे शील सरूपी ओ रंग । (२)
 देवा सोनी ओ हरिचन्द सत भणे, वटे रंग सूं मिलाया ओ रंग ॥ (२)
 देवा उलट नाभी ओ चढ़ी वंक पे

राग मलार आरती भजन-४

सखीए शिखर चढ़ी ओ सुरता सुन्दरी ओ, वटे नवखंड नाम निशंक ।
सखीए अधर उतारे ओ आरती, सेवा सुन्दर नार निशंक ॥ (२)
सखीए निर्भय नौपत वटे बज रही ॥ टेर ॥

सखीए चार जोताओ दरसे निरमली ओ, ज्यांरे निरंजन देव निशंक । (२)
सखीए प्रेम पिताम्बर पहरिया ओ, करती निज मन सेव निशंक ॥ (२)
सखीए शिखर चढ़ी ओ सुरता सुन्दरी.....

सखीए आप तत्व जल आरती ओ, गंगा शीश चढ़ाई निशंक । (२)
सखीए पृथ्वी कंचन सेवा शुभ चढ़े ओ, अंगा केसर मुगट निशंक ॥ (२)
सखीए शिखर चढ़ी ओ सुरता सुन्दरी.....

सखीए वायु तत्व हरि आरती ओ, दम निर्गुण स्वास निशंक । (२)
सखीए तेज सुरखर जोतां जल रही ओ, खेवे निरंजन पाठ निशंक ॥ (२)
सखीए शिखर चढ़ी ओ सुरता सुन्दरी.....

सखीए श्याम तत्व सुख आरती ओ, जागो सुखमण नाड़ निशंक । (२)
सखीए घण-घण घंटा ओ वटे बज रहा, सुरती तार मिलाया निशंक ॥ (२)
सखीए शिखर चढ़ी ओ सुरता सुन्दरी.....

सखीए वेगम नगरी ओ वटे बस रही ओ, ज्यांरे ज्योति सरूप निशंक । (२)
सखीए हरदम सेवा ओ सुरत करे, ज्यांरे निर्गुण रूप निशंक ॥ (२)
सखीए शिखर चढ़ी ओ सुरता सुन्दरी.....

सखीए वेगमपुरी ओ बाजे बंसरी, गावे निर्वाणी पद निशंक । (२)
सखीए पांच सम्पूरण आरती ओ, पद परवाणी निर्भय निशंक ॥ (२)
सखीए शिखर चढ़ी ओ सुरता सुन्दरी.....

सखीए आप अनोप जप तप किया ओ, ज्यांरा नकलंग नाम निशंक । (२)
सखीए सोनी हरिचन्द करे आरती ओ, माला रट-रट राम निशंक ॥ (२)
सखीए शिखर चढ़ी ओ सुरता सुन्दरी.....

भजन आरोधी प्रमाण राग सारंग-१

आप अलख्रजी, सकल मांय सेवा ओ जी, अबे मोरी वार करो नकलंग देवा ओ राज ।

आप अलख्रजी, सकल मांय सेवा ओ ओ जी ॥ टेर ॥

वारी प्रथम देव, गणपतीजी पुजू ओ ओ जी, वारी सस्वत चरण तुम्हारी ओ राज । (२)

कलजुग जाल, कालींगो वस्ते ओ ओ जी, जणे समझ घटाई सारी ओ राज ॥ (२)

आप अलख्रजी, सकल मांय सेवा ओ ओ जी.....

वारी आतम खोज, अलख्रजी ने ध्यावो ओ ओ जी, म्हारा नकलंग नेजा धारी ओ राज । (२)

राक्षसे रोळ, जगत मांही मांडी ओ ओ जी, आतो दुनिया तरसे है सारी ओ राज ॥ (२)

आप अलख्रजी, सकल मांय सेवा ओ ओ जी.....

वारी होमे ओ प्राण, धरण जद धूजे ओ ओ जी, एतो आतम कुण उदारी ओ राज । (२)

गुपतीए घात, घोरोघर मांडी ओ ओ जी, एतो राक्षस फरे है शिकारी ओ राज ॥ (२)

आप अलख्रजी, सकल मांय सेवा ओ ओ जी.....

वारी शशी और भाण, ज्योत में झांका ओ ओ जी, ए तो तीसुई ग्रहण तैयारी ओ राज । (२)

परदे ओ जादू, जाल चलाया ओ ओ जी, एतो बालक जणे है कुआरी ओ राज ॥ (२)

आप अलख्रजी, सकल मांय सेवा ओ ओ जी.....

वारी भोजनरी भूख, भोजन सुई भागे ओ ओ जी, ए तो आतम अन्न का आहारी ओ राज । (२)

दसखत गायो, वेरी ओ वाढण लागो ओ ओ जी, आतो सुखे अलख्र थारी वाडी ओ राज ॥ (२)

आप अलख्रजी, सकल मांय सेवा ओ ओ जी.....

वारी आप अनोप, अखंडजी ने धाया ओ ओ जी, ज्यांने जुग तारण वात विचारी ओ राज । (२)

सोनी ओ हरिचन्द, दुखबल दाखे ओ ओ जी, म्हारा नकलंगजी री बलिहारी ओ राज ॥ (२)

आप अलख्रजी, सकल मांय सेवा ओ ओ जी.....



भजन आरोधी प्रमाण राग सारंग-२

नकलंग राव, अलख्र वारु आवो ओ ओ जी, ओ तो राक्षस खेल खपावो ओ राज ।

नकलंग देव, अलख्र वारु आवो ओ जी । (टेर)

वारी सतजुग आद, सदा ही सुख होता ओ ओ जी, अबे जगत जाल मांही पड़िया ओ राज । (२)

दान पति, दाता ओ नही दरसे ओ ओ जी, ऐतो जगत जादु से ही गलिया ओ राज ॥ (२)

नकलंग राव, अलख्र वारु आवो ओ जी..... (टेर)

वारी रियासत राजा, रंगदारी मे रहता ओ ओ जी, अबे देव टिकाणा तो ठरिया ओ राज । (२)

सुध-बुध लक्ष्मी, लार नही दरसे ओ ओ जी, ऐ तो भुला कुटुम्ब वारी कीरिया ओ राज ॥ (२)

नकलंग राव, अलख्र वारु आवो ओ जी..... (टेर)

वारी हर सुं तो हेत, हिरदा मांही होता ओ ओ जी, ऐ तो दारु से दीन बिगड़िया ओ राज । (२)

सुन्दर नार सति, नही दरसे ओ ओ जी, ऐ तो भूत भीतर मांही भरीया ओ राज ॥ (२)

नकलंग राव, अलख्र वारु आवो ओ जी..... (टेर)

वारी माणक रतन, हीरा हद होता ओ ओ जी, अबे कांच कपाटां में जड़िया ओ राज । (२)

शशी और भाण, दीपक नाही दरसे ओ ओ जी, ऐ तो अंधारे जाए ने अड़ीया ओ राज ॥ (२)

नकलंग राव, अलख्र वारु आवो ओ जी..... (टेर)

वारी अन्न फल मेवा, दूध रस पीता ओ ओ जी, अबे मन तो मांस मांही धरीया ओ राज । (२)

दिल मांही दान, दया नही दरसे ओ ओ जी, ऐ तो नरक पावड़िये चढ़िया ओ राज ॥ (२)

नकलंग राव, अलख्र वारु आवो ओ जी..... (टेर)

वारी आप अनोप, अंतरगढ़ जोया ओ ओ जी, जणे अमर काम तो आदरीया ओ राज । (२)

सोनी ओ हरिचन्द, सतगुरु शरणे ओ ओ जी, अबे मुलकां में नाम वापरिया ओ राज ॥ (२)

नकलंग राव, अलख्र वारु आवो ओ जी..... (टेर)



भजन आरोधी प्रमाण राग सारंग-३

जगत तारण धणी, आप पधारो ओ ओ जी, आ तो आतम जून उदारो ओ राज ॥ (२)

जगत तारण धणी, आप पधारो ओ ओ जी ॥ टेर ॥

वारी गाज ओ बीज, वावल नहीं होता ओ ओ जी, अणे दुश्मने दरद वधाया ओ राज ॥ (२)

वेरी ओ वात, मालिक नामे दाखे ओ ओ जी, अणे वासा काल लगाया ओ राज ॥ (२)

जगत तारण धणी, आप पधारो ओ ओ जी.....

वारी मंतर सीकी, टीपणा नहीं होता ओ ओ जी, अणे हर माथे हुकम हलाया ओ राज ॥ (२)

मंतर थम्ब, दूगटिया दाखे ओ ओ जी, अणे भदरा भरम मिलाया ओ राज ॥ (२)

जगत तारण धणी, आप पधारो ओ ओ जी.....

वारी जहेरी ओ जून, सरप नहीं होता ओ ओ जी, अणे अदबुद रोग चलाया ओ राज ॥ (२)

ब्राह्मण भणे, भेद नहीं भाखे ओ ओ जी, अणे हेतां सूं कपट हलाया ओ राज ॥ (२)

जगत तारण धणी, आप पधारो ओ ओ जी.....

वारी राक्षस राहू, केतु नहीं होता ओ ओ जी, अणे गुपतीए ग्रह तो लगाया ओ राज ॥ (२)

उपज खपज, रास माथे दाखे ओ ओ जी, अणे जगत झूठ कर ख्राया ओ राज ॥ (२)

जगत तारण धणी, आप पधारो ओ ओ जी.....

वारी सकरां तो दिशा, सूल नहीं होता ओ ओ जी, अणे जोगण दूत हलाया ओ राज ॥ (२)

राक्षस कुली, राम नहीं दाखे ओ ओ जी, अणे घोघर काट घलाया ओ राज ॥ (२)

जगत तारण धणी, आप पधारो ओ ओ जी.....

वारी आप अनोप, धरण गुण धाया ओ ओ जी, जणे जोए-जोए जुग समझाया ओ राज ॥ (२)

सोनी ओ हरिचन्द्र, दूरस कर दाखे ओ ओ जी, जणे देव दरशण गुण पाया ओ राज ॥ (२)

जगत तारण धणी, आप पधारो ओ ओ जी.....



भजन आरोधी प्रमाण राग सारंग-४

आलम राज, करो असवारी ओ ओ जी, मोर मुगट सिर धारी ओ राज ।

नकलंग देव, करो असवारी ओ ओ जी ॥ टेर ॥

वारी नकलंग देव, निरंजन पूजु ओ ओ जी, वारी आतम अरज सुणीजे ओ राज । (२)

असुरांरो अमल, मुलक मांय वेगो ओ ओ जी, अबे वसती री वार करीजे ओ राज ॥ (२)

आलम राज, करो असवारी ओ ओ जी.....

संत समरणा, सत सूंही फेरे ओ ओ जी, ओ तो जगत धणी सूं धीजे ओ राज । (२)

जोगी रो जोग, भोग से भागो ओ ओ जी, ओ तो रोळ मसखरी में रीझे ओ राज ॥ (२)

आलम राज, करो असवारी ओ ओ जी.....

राक्षसे बारा, पंथ चलाया ओ ओ जी, ए तो बरतन मांहि वटलीजे ओ राज । (२)

वरण चौरासी, जुमला में जीमे ओ ओ जी, ए तो भेला बैट भगतीजे ओ राज ॥ (२)

आलम राज, करो असवारी ओ ओ जी.....

वारी जोग वेरागी, जल मांही झीले ओ ओ जी, ए तो कतको सूंही कूटीजे ओ राज । (२)

भरमाणो भेख, भेद वना भटके ओ ओ जी, ऐ तो लखणो सुंही लुटीजे ओ राज ॥ (२)

आलम राज, करो असवारी ओ ओ जी.....

वारी खान राजेश्वर, खड्ग संभालो ओ ओ जी, थांरी लक्ष्मी रो खेत लूटीजे ओ राज । (२)

शस्त्र धार, खड्क हाथे झालो ओ ओ जी, पछे असुरो पे उडीजे ओ राज ॥ (२)

आलम राज, करो असवारी ओ ओ जी.....

वारी आप अनोप, सरबंग मांहि सजीआ ओ ओ जी, ऐ तो जाल मांहि झपटीजे ओ राज । (२)

सोनी ओ हरिचन्द, करे है विनंतियां ओ ओ जी, ऐ तो धणी तो धरम सुं रीझे ओ राज ॥ (२)

आलम राज, करो असवारी ओ ओ जी.....



राग सारंग आगम प्रमाण भजन-१

वारीओ सतीयां थे सत मत छोड़जो,(२) आदू सतजुग आवे ओ ओ जी ।
 वारीओ बीज वदलियोरा मानवी,(२) ज्यांने कलजुग भावे ओ ओ जी ॥
 वारीओ वेरी ओ मारण साहिबो,(२) बाबो नकलंग आवे ओ ओ जी ॥ टेर ॥

वारीओ समरु ओ गणपति राजवी,(२) सरस्वती सहाय करीजे ओ ओ जी ।
 वारीओ जगत तारण री है वास्ता,(२) आदु अरज सुणीजे ओ ओ जी ॥
 वारीओ सतीयां थे सत मत छोड़जो.....

वारीओ सुख दुख राजाओ पूछेला,(२) हासल हक रो घालीजे ओ ओ जी ।
 वारीओ लखरतो चौरासी ओ जून री,(२) पाछी परथा पालीजे ओ ओ जी ॥
 वारीओ सतीयां थे सत मत छोड़जो.....

वारीओ दूध देवे सोई पदमणी,(२) ज्योकूं नमन करीजे ओ ओ जी ।
 वारीओ लीला लहेर जद होवसी,(२) लेके भोग भरीजे ओ ओ जी ॥
 वारीओ सतीयां थे सत मत छोड़जो.....

वारीओ धरम धजा ओ घर-घर बांधसी,(२) हरसुं हाथ जोड़ीजे ओ ओ जी ।
 वारीओ वीसा पंथी ओ भोगी बगड़िया,(२) ताको पंथ तोड़ीजे ओ ओ जी ॥
 वारीओ सतीयां थे सत मत छोड़जो.....

वारीओ जुग में बगड़ेला ओ राक्षसी,(२) ज्यांरे वाट देरीजे ओ ओ जी ।
 वारीओ तीर्थांगर पंथ ओ टूटसी,(२) नकलंग आण फेरीजे ओ ओ जी ॥
 वारीओ सतीयां थे सत मत छोड़जो.....

वारीओ आप अनोप अलख धणी,(२) चरणे शीश नमाईजे ओ ओ जी ।
 वारीओ सोनी हरिचन्द करे वीणती,(२) सत री भगती कमाईजे ओ ओ जी ॥
 वारीओ सतीयां थे सत मत छोड़जो.....

राग सारंग आगम प्रमाण भजन-२

वारीओ सुणजो सतजुग री ओ वारता,(२) वरसो लाख जीवंता ओ ओ जी ।
जदी अन्न फल मेवा बोळी उतपती,(२) अमरत दूध पीवंता ओ ओ जी ॥
जदी दानव दुरगों में आवता,(२) आतम तुरंत तोडंता ओ ओ जी ॥ टेर ॥

वारीओ धरणी माता तो आदु धणी,(२) ज्यों में देव दीवाणा ओ ओ जी ।
एतो श्याम तत्व में प्रगट हुआ,(२) सो घर काल केवाणा ओ ओ जी ॥
वारीओ सुणजो सतजुग री वारता.....

वारिओ देव दानवों माथे कोपिया,(२) शस्त्र धनुष धारोणा ओ ओ जी ।
पछे जमड़ा रे साथे युद्ध किया,(२) दानव दूत मारोणा ओ ओ जी ॥
वारीओ सुणजो सतजुग री वारता.....

पछे ब्रह्माजी भेद विचारिया,(२) धर्म वेद धारोणा ओ ओ जी ।
जदी रेण पड़िये राक्षस आवता,(२) सतरा वेद चोरोणा ओ ओ जी ॥
वारीओ सुणजो सतजुग री वारता.....

पछे ब्रह्मा देव समापत हुआ,(२) वंटा वेद वंचोणा ओ ओ जी ।
जदी परदे ओ पाप चलाविया,(२) जदी जादू रचाणा ओ ओ जी ॥
वारीओ सुणजो सतजुग री वारता.....

पैली दूर्गा जादू तो प्रगट किया,(२) साथे होम हलोणा ओ ओ जी ।
जदी राक्षसे रोग चलाविया,(२) कलजुग नाम देरोणा ओ ओ जी ॥
वारीओ सुणजो सतजुग री वारता.....

वारीओ आप अनोप अंतर ध्यानी,(२) चौड़े चोर लेरोणा ओ ओ जी ।
वारीओ सोनी हरिचन्द दीपक जोविया,(२) हिरदे चोर हेरोणा ओ ओ जी ॥
वारीओ सुणजो सतजुग री वारता.....

राग सारंग आगम प्रमाण भजन-३

वारीओ पारस पृथ्वी को जाणसी,(२) सो नर देश दीवाणा ओ ओ जी ।
 वारीओ पूरा सतगुरु ज्योने भेटिया,(२) अमर नाम लेवाणा ओ ओ जी ॥
 वारीओ मदमाटी राक्षस भरखता,(२) सो घर नरक केवाणा ओ जी जी ॥ टेरे ॥

वारीओ आदू जरणी तो अमर पती,(२) ज्यां में ज्योत प्रकाशा ओ ओ जी ।
 वारीओ धरम किया सुं धरणी तरे,(२) ज्यां में जुग सुख वासा ओ ओ जी ॥
 वारीओ पारस पृथ्वी कुं जाणसी.....

वारीओ धरणी थाकी पूरा पाप सूं,(२) राक्षस करे है रणवासा ओ ओ जी ।
 वारीओ राम कला रंग चेतसी,(२) होसी तुरंत तपासा ओ ओ जी ॥
 वारीओ पारस पृथ्वी कुं जाणसी.....

वारीओ छत्रपति ओ सब चेतसी,(२) चेती खान खवासा ओ ओ जी ।
 वारीओ सुरा ओ शस्त्र बांधसी,(२) आवी मुल्कों में वासा ओ ओ जी ॥
 वारीओ पारस पृथ्वी कुं जाणसी.....

वारीओ नकलंग दल तो चढ़ावसी,(२) दल में पदम पचासा ओ ओ जी ।
 जदी दानव देरासर टूटसी,(२) टूटी जमों रा रंग रासा ओ ओ जी ॥
 वारीओ पारस पृथ्वी कुं जाणसी.....

वारीओ करतब नगरी ओ टूटसी,(२) राक्षस मार खुलासा ओ ओ जी ।
 जदी जवर कंचन लक्ष्मी लावसी,(२) घर घर ज्योत प्रकाशा ओ ओ जी ॥
 वारीओ पारस पृथ्वी कुं जाणसी.....

वारीओ आप अनोप अमर होसी,(२) ज्यारी जुगो जुग आशा ओ ओ जी ।
 वारीओ सोनी हरिचन्द दुर्बल दाखवे,(२) ज्यांरा अमरापुर वासा ओ ओ जी ॥
 वारीओ पारस पृथ्वी कुं जाणसी.....

राग सारंग आगम प्रमाण भजन- ४

वारीओ मुलको में मादल वाजसी,(२) सतियां करसी सामेव्वा ओ ओ जी ।
 वारीओ देव कला दिल में जाणजो,(२) रहेजो भाव सूं भेला ओ ओ जी ॥
 जदी नकलंग न्याय तपावसी,(२) होसी तुरंत निवेडा ओ ओ जी ॥ टेर ॥

वारीओ सातो दीपो में सदर धणी,(२) नव खंड नाम निशानी ओ ओ जी ।
 वारीओ चारो खूंटो में छत्रपति,(२) नकलंग नाम पहेचाणी ओ ओ जी ॥
 वारीओ मुलको में मादल वाजसी.....

वारीओ धरम वेद दूजा धारसी,(२) नकलंग वेद वखाणी ओ ओ जी ।
 वारीओ देव कला ओ जदी दरसेला,(२) सतजुग री सेलाणी ओ ओ जी ॥
 वारीओ मुलको में मादल वाजसी.....

वारीओ रोग घटी ओ सुख उपजी,(२) होसी दरिद्र री होणी ओ ओ जी ।
 आतो सुध-बुध वस्ती में वापरी,(२) परजा फिरसी फूलोणी ओ ओ जी ॥
 वारीओ मुलको में मादल वाजसी.....

वारीओ कडुआ सायर मीटा होवसी,(२) चढ़सी नाम निरवाणी ओ ओ जी ।
 वारीओ चंद्र कला ओ तीसूंई ऊगसी,(२) पूरी वात परवाणी ओ ओ जी ॥
 वारीओ मुलको में मादल वाजसी.....

वारीओ नकलंग भक्ति ओ चालसी,(२) रमसी देव दीवाणी ओ ओ जी ।
 ऐतो सत रा ओ मंगल गावसी,(२) गावी परजा पटराणी ओ ओ जी ॥
 वारीओ मुलको में मादल वाजसी.....

वारीओ आप अनोप जनम लियो,(२) जुग मे ज्योत जगोणी ओ ओ जी ।
 वारीओ सोनी हरिचन्द नकलंग भेटिया,(२) सतजुग भक्ति छपोणी ओ ओ जी ॥
 वारीओ मुलको में मादल वाजसी.....

राग तेलंग कामोद भजन वाणी-१

वारीओ कुदरत कला समर मेरा भाई,
सब गुणपती सरट उपाई जी ॥ टेर ॥ (२)

वारीओ सब गुण गुणपती धरणीओ मांय, भेद पाया ओ जद भगती उपाई जी ॥ (२)
वारीओ रोम-रोम मांही अमस्त वरसे, आद गुणो रो पति कोई एक परसे जी ॥ (२)
वारीओ कुदरत कला समर मेरा भाई.....

वारीओ करणी से ज्योत, ज्योत मांय करणी, अखंड कुंआरी जगत की ओ जरणी जी ॥ (२)
वारी जरणी रा गुण से सरब गुण व्यापे, भूलोडा जोगी अगन धूणी तापे जी ॥ (२)
वारीओ कुदरत कला समर मेरा भाई.....

वारीओ एक गुणपतजी खातण ओदर आया, दूजा गुणपतजी पार्वतीजी जाया जी ॥ (२)
वारीओ तीजा गुणपतजी अपरम पारा, रचना रची ओ ज्यारे दस-दस द्वारा जी ॥ (२)
वारीओ कुदरत कला समर मेरा भाई.....

वारीओ भरम भरम से आ परजा ओ भूली, तोड़े पत्थर ने बणावत दूली जी ॥ (२)
वारीओ ज्यांने तो गुरुगम कणवद आवे, आद गुणो रो पति अन्न जल लावे जी ॥ (२)
वारीओ कुदरत कला समर मेरा भाई.....

वारीओ तुरका हिन्दुओं धणी दोनो टेराया, मालिक एक मरम नहीं पाया जी ॥ (२)
वारीओ मुसलमान हिन्दू एकण द्वारा, गरु माटी खाणे से दरसत न्यारा जी ॥ (२)
वारीओ कुदरत कला समर मेरा भाई.....

वारीओ आप अनोप सरब गुण जाणी, पृथ्वी पति ओ हरीगुण वेद लखाणी जी ॥ (२)
वारीओ सोनीओ हरिचन्द दुर्बल दाखे, आद अलखजी रा हरिगुण भाखे जी ॥ (२)
वारीओ कुदरत कला समर मेरा भाई.....



राग तेलंग कामोद भजन वाणी-२

वारीओ जोग जगत ज्यांकू परसण थाय,
गावे मंगल सुमरे स्वास उसासाजी ॥ टेर ॥ (२)

वारीओ सरस्वती समरू ओ स्वराणी मांय, पृथ्वी द्वारा ओ मांजी मुखमंडल वासा जी ॥ (२)
वारीओ ब्रह्मा ओ विष्णु शिवशंकर धाय, आद जुगाद जरणी थारी आशा जी ॥ (२)
वारीओ जोग जगत ज्यांकू परसण.....

वारीओ जागत अणबे अस्थ आतम मांय, भजन विचारा राख्रो विश्वासा जी ॥ (२)
वारीओ पारस परदे, मणी ओ मंडप मांय, देव दर्शन ज्यां अखंड उजासा जी ॥ (२)
वारीओ जोग जगत ज्यांकू परसण.....

वारीओ अला ओ पिंगला सती ओ सुखमण राय, आद धणी ज्यांसु करलो उरदासा जी ॥ (२)
वारीओ नूस्त तेज मांय सूस्ती समाय, अलक आरोदे सोई रहे अपवासा जी ॥ (२)
वारीओ जोग जगत ज्यांकू परसण.....

वारीओ नासा नैणा रे बिचे तंत मिलाय, त्रवणी महेल मांय करलो तपासा जी ॥ (२)
वारीओ शशी और भाण धारा दोए दरसाय, संत सुरा वटे करत कैलाशा जी ॥ (२)
वारीओ जोग जगत ज्यांकू परसण.....

वारीओ गगन मंडल घेरी घोर सुणाय, नटवर स्वामी ज्यां ज्योत प्रकाशा जी ॥ (२)
वारीओ देश दीवाणा कोई उलट समाय, संत सबागी चढिया कर कर उमासा जी ॥ (२)
वारीओ जोग जगत ज्यांकू परसण.....

वारीओ आप अनोप देव गुण पाय, समझ बताई गुरु करली बरदासा जी ॥ (२)
वारीओ सोनी हरिचन्द ज्यांरा मंगल गाय, नाम दिया ओ धणी नरभे निवासा जी ॥ (२)
वारीओ जोग जगत ज्यांकू परसण.....



राग तेलंग कामोद भजन वाणी-३

वारीओ आद धणीरी संतो करलो ओलख्राणी,
परदे में गुण परगट रणुकारा जी ॥ टेर ॥ (२)

वारीओ आद ओ अंत धरण अंबर मांय, भीतर बाहर दम का करलो विचारा जी ॥ (२)
वारीओ जरणी री ज्योत में जगत समाया, अलख बूंद ज्योरा सकल पसारा जी ॥ (२)
वारीओ आद धणीरी संतो करलो ओलख्राणी.....

वारीओ नाभी कमल मांय वायु समाय, जल का ओ बंद अगन करती आरा जी ॥ (२)
वारीओ पांच तत्व गुण तीनोई मांय, ज्यारें बीचे चेतन अलख सेजारा जी ॥ (२)
वारीओ आद धणीरी संतो करलो ओलख्राणी.....

वारीओ दस द्वार कर सर थंब बणाया, अजब रूप धरिया अधर आकारा जी ॥ (२)
वारीओ पांच मिट्टी पांचुई रंग मिलाया, ज्यां में चेतन स्वामी करत पुकारा जी ॥ (२)
वारीओ आद धणीरी संतो करलो ओलख्राणी.....

वारीओ शशी और नाडी नखर भांग उपाया, कुदरत एक बरतन दोनूं न्यारा जी ॥ (२)
वारीओ भजन विचारी कोई मारम पाया, ज्ञान ध्यान ज्यारें समझ आसारा जी ॥ (२)
वारीओ आद धणीरी संतो करलो ओलख्राणी.....

वारीओ मेरु शिखर मांय तेज सवाया, जण घर भंवरा करत गुंजारा जी ॥ (२)
वारीओ ब्रह्म ज्ञान से अगम घर पाया, अरबी वाजा सोई अलख अख्राड़ा जी ॥ (२)
वारीओ आद धणीरी संतो करलो ओलख्राणी.....

वारीओ आप अनोप नकलंग पद पाया, अवरं तारण स्वामी आतम उदारा जी ॥ (२)
वारीओ सोनी हरिचन्द ज्यांकु शीश नमाया, सतगुरु स्वामीजी मारा करजो निरधारा जी ॥ (२)
वारीओ आद धणीरी संतो करलो ओलख्राणी.....



राग तेलंग कामोद भजन वाणी-४

वारीओ स्वर्ग लोकरी थे खड़की पण खोलो,
कूंची अकलरी आतम मांय जोए लो जी जी ॥ टेरे ॥ (२)

वारीओ समझ आई ओ जद सतगुरुजी पाया, आद गुरुजी म्होने अगम बताया जी ॥ (२)
वारी आदु तो करणी कठिन म्हारा वीरा, स्वर्ग जोया ओ ज्यांरा नाम फकीरा जी ॥ (२)
वारीओ स्वर्ग लोकरी थे खड़की पण खोलो.....

वारीओ पांचु इन्द्रियां जासा ओ बंदण दीजे, पांच तत्व गुण पवन संग लीजे जी ॥ (२)
पछे आसण पदम चढावो म्हारा वीरा, शिखर चढे ओ ज्यांरा नाम फकीरा जी ॥ (२)
वारीओ स्वर्ग लोकरी थे खड़की पण खोलो.....

वारीओ नाभी नेणा ओ नासा तीर गुण जोणा, मन मांय मोती पवन सुई पोणा जी ॥ (२)
पछे दुर्मति दूर करीजे म्हारा वीरा, हरदम हेरे ज्यांरा नाम फकीरा जी ॥ (२)
वारीओ स्वर्ग लोकरी थे खड़की पण खोलो.....

वारीओ पांच तीन गुण शामिल कीजे, आटोई उलट अगर पर लीजे जी ॥ (२)
पछे वंकी तो नाल जगाओ म्हारा वीरा, तखत चढिया ओ ज्यांरा नाम फकीरा जी ॥ (२)
वारीओ स्वर्ग लोकरी थे खड़की पण खोलो.....

वारीओ वेगम नगरी में वणज सवाया, नगर गया सोई निज मोती लाया जी ॥ (२)
वटे वदका तो वणज करीजे म्हारा वीरा, फिकर मेटे ओ ज्यांरा नाम फकीरा जी ॥ (२)
वारीओ स्वर्ग लोकरी थे खड़की पण खोलो.....

वारी आप अनोप सरब गुण सीधा, उलट अमी ओ रस भर-भर पीधा जी ॥ (२)
वारीओ सोनी हस्चिन्द कहवे सुन मन वीरा, रहेणी रेवे ज्यांरा नाम फकीरा जी ॥ (२)
वारीओ स्वर्ग लोकरी थे खड़की पण खोलो.....



राग-माड़ पृथ्वी प्रमाण भजन-१

वारी गुण को रटो तो गुणपती ओलखो भाई,
ज्यांरी अमर कला ओ जरणी जाणिये हे, हे ।

रिजक जग में पूरवे भाई ॥ टेर ॥

सरसत परसण देव दरसण, स्वास में सोमकार हो । (२)

गुणपत देवा सफल सेवा, आदगुण अँकार ओ ॥ (२)

वारी गुण को रटो तो गुणपती ओलखो भाई.....

गम कर हीरदे हेरलो, परगट अंबर गाज ओ । (२)

गुणपत परगट दरसीया, ज्यां तत्व गुण को राज ओ ॥ (२)

वारी गुण को रटो तो गुणपती ओलखो भाई.....

तत्व गुण तरवर हरि गुण, जगत पालण जग धणी । (२)

गुणपत धरणी पार अपरम, सरब सिद्धि बहुघणी ॥ (२)

वारी गुण को रटो तो गुणपती ओलखो भाई.....

वारी ज्ञान ध्यान प्रताप गुण को, गुण लाया गुणपती । (२)

सरट को फल नित देवे, जगत जरणी महासती ॥ (२)

वारी गुण को रटो तो गुणपती ओलखो भाई.....

पांणी पृथ्वी बैल अन्न रुई, भैंस गउ भेड़ी ऊँट अज्या । (२)

गेद तुरंगा तरु रासबी, रतन चवदेई गुण सजीया ॥ (२)

वारी गुण को रटो तो गुणपती ओलखो भाई.....

क्रोड तैतीस देव निरमल, हुआ देवत गुण रटे । (२)

पृथ्वी ओ गुणपति आद से, ज्या रतन चवदेई जो अटे ॥ (२)

वारी गुण को रटो तो गुणपती ओलखो भाई.....

अनोपस्वामी गुण ही गुण का, किया जग में वेद धारण । (२)

सोनी हरिचन्द रटे गुणपत, आया स्वामी जुग तारण ॥ (२)

वारी गुण को रटो तो गुणपती ओलखो भाई.....

राग-माड़ पृथ्वी प्रमाण भजन-२

वारी सरठ तारण स्वामी आवीया भाई,
वारीओ भरत खंड रा ओ राजवी हे, हे ।
नकलंग देव आविया भाई ॥ टेरे ॥

पृथ्वी ओ पालण आद से, अणबोला बोला जीव ओ । (२)
वारी हेलो देवे आतमा, पधारो नकलंग पीव ओ ॥ (२)
वारी सरठ तारण स्वामी आवीया भाई.....

नकलंग राक्षसों कूं मारसी, दूजारी करसी पाल ओ । (२)
सतजुग आवी झूलता, भागे ओ जासी काल ओ ॥ (२)
वारी सरठ तारण स्वामी आवीया भाई.....

जगत आवी जात्रा, लेले फूलोरी साब ओ । (२)
धणीओ री करसी आरती, वे लेसी दूणा लाभ ओ ॥ (२)
वारी सरठ तारण स्वामी आवीया भाई.....

रंग सूई राजा आवसी, नकलंग करसी न्याय ओ । (२)
मारेला गुप्ती गामड़ा, चारों जुगों रो दाव ओ ॥ (२)
वारी सरठ तारण स्वामी आवीया भाई.....

दल में दीपक जोड़सी, तसकरां संदो तेल ओ । (२)
गुपतीयो रे घेरो घालसी, नकलंग करसी खेल ओ ॥ (२)
वारी सरठ तारण स्वामी आवीया भाई.....

अनोपस्वामी आविया, काढी सरठरी सोत ओ । (२)
सोनी ओ हरिचन्द्र यूं भणे, जागी है जुग में ज्योत ओ ॥ (२)
वारी सरठ तारण स्वामी आवीया भाई.....

राग-माड़ पृथ्वी प्रमाण भजन-३

वारी आद अलख धणी ओलखो भाई,
ज्यारे देव दरसण दिल में दरसीया हे, हे ।
अलख स्वामी आवीया भाई ॥ टेरे ॥

आद धरणी अगम अंबर, भांण शशी और सुर चले । (२)
तारा मंडल तेज निरमल, सरट में स्वामी मिले ॥ (२)
वारी आद अलख धणी ओलखो भाई.....

सरट सिक्का श्याम रा, नकलंग नामा चालसी । (२)
भजन रो परताप भारी, मुलक माला झालसी ॥ (२)
वारी आद अलख धणी ओलखो भाई.....

मुलको में मादल वाजसी, घर-घर बांधी माल ओ । (२)
नकलंग चढ़सी न्याय पे, ज्यांरी संत पकड़ी चाल ओ ॥ (२)
वारी आद अलख धणी ओलखो भाई.....

काशी ओ पंडित वेद पढ़सी, देव रे दरबार ओ । (२)
वारी खोट काढी खलकरी, चाली धरम उपकार ओ ॥ (२)
वारी आद अलख धणी ओलखो भाई.....

सरद गरमी रोग भागी, चाली सुख रा स्वास ओ । (२)
इन्द्र माला घूमसी, बरसेला बारोई मास ओ ॥ (२)
वारी आद अलख धणी ओलखो भाई.....

अनोपस्वामी अलख रुपी, अलख रंग में वे रमे । (२)
सोनी हरिचन्द श्याम चरणे, शीश ले चरणा नमे ॥ (२)
वारी आद अलख धणी ओलखो भाई.....

राग-माड़ पृथ्वी प्रमाण भजन-४

वारी दिल से लखे सो अलेख देवता भाई
 ए तो अलख निरंजन जाणीये हे हे ।
 ए गुण अवतारी ओलखे भाई ॥ टेर ॥

आद धरणी अखंड जरणी, सरब देवा मांय बसे । (२)
 वारी जड़ चेतन रूप पचरंग, सरब सिद्धि आ रचे ॥ (२)
 वारी दिल से लखे सो अलेख देवता भाई.....

वारी हाड़ गिरवर मांस माटी, चाबरुं मांय बाहर दरसे । (२)
 दीप सपत खंड नव में, कलाधारी कोई एक परसे ॥ (२)
 वारी दिल से लखे सो अलेख देवता भाई.....

वारी नदी नाड़ी ओज दरीआ, माजी मुख से जल भरे । (२)
 वारी रोम-रोम अमरत बरसे, जल से सब जुग तरे ॥ (२)
 वारी दिल से लखे सो अलेख देवता भाई.....

वारी सीप सायर रतन गिरवर, सीप में मोती बसे । (२)
 वारी ध्यान कर कर खंड देखो, गुण कुदरत जुग रचे ॥ (२)
 वारी दिल से लखे सो अलेख देवता भाई.....

वारी हंस ज्यूं परमहंस ज्ञानी, सरब गुण में वे सजे । (२)
 वारी करे करणी देख दरशण, धरम कारण देही तजे ॥ (२)
 वारी दिल से लखे सो अलेख देवता भाई.....

अनोपस्वामी अमर नामी, धरण रा गुण वे लखे । (२)
 सोनी हरिचन्द पाया दरशण, न्याय जुग रो कर सके ॥ (२)
 वारी दिल से लखे सो अलेख देवता भाई.....

राग-माड़ पृथ्वी प्रमाण भजन-५

वारी सोई परत जुग पालसी भाई
ज्यांरे दिल में देव गुण आवसी हे हे ।
गुरुगम गुण गावसी भाई ॥ टेर ॥

सतजुग सुखिया आवसी, ज्यांरे नित निरमल नूर ओ । (२)
वारी मन बोळा फूलसी, ज्यांरी दकल भागी दूर ओ ॥ (२)
वारी सोई परत जुग पालसी.....

भलाई जागी ब्रह्म में, वे सांच बोली सब जणा । (२)
ज्यांरे ज्ञान घट में उपजी, वे नाम लेसी हरतणा ॥ (२)
वारी सोई परत जुग पालसी.....

ऋषि राजा ध्यान करसी, वचन गुरुगम वे चली । (२)
सती सुरा अष्ट देवा, मन शीतल बुध भली ॥ (२)
वारी सोई परत जुग पालसी.....

वारी अंतर अणबे चेतसी, सुरसत मांय उगाव ओ । (२)
सेजे समरण वे करी, ज्यांरे भेद से कर भाव ओ ॥ (२)
वारी सोई परत जुग पालसी.....

वारी पतिव्रता धरम पाली, पति लक्ष्मी मानसी । (२)
अवतार नामे नमण करसी, हुकम ले ले हालसी ॥ (२)
वारी सोई परत जुग पालसी.....

अनोपस्वामी ध्यान कर-कर, सरब गुण का सार लाया । (२)
सोनी हरिचन्द जगत रूपी, अमर प्याला वांई पाया ॥ (२)
वारी सोई परत जुग पालसी.....

राग-माड़ पृथ्वी प्रमाण भजन-६

वारी जगत उदारण जागो भाई ।

वारी पृथ्वी पालण महा पद पाविया हे हे ॥

आलम राज आविया भाई ॥ टेर ॥

सरस्वत माजी समरीये, सुद बुद दीजो देव ओ । (२)

गुणपतजी महाराज स्वामी, करुं सतमन सेव ओ ॥ (२)

वारी जगत उदारण जागो भाई.....

रावण मारीयो राम ज्यां दिन, दुष्ट आया देश ओ । (२)

जुग पर जादू फेरियो, अण पाप रे परवेश ओ ॥ (२)

वारी जगत उदारण जागो भाई.....

ब्रह्मा ओ भूला भौम सारी, लिया विक्रम वेद ओ । (२)

राक्षसे राज दबाविया, घर-घर कर दी खेद ओ ॥ (२)

वारी जगत उदारण जागो भाई.....

जपीया ओ जोगण वीर जादू, हाथे गरीया होम ओ । (२)

परगट गुपती पाप कर-कर, डबोई सारी भौम ओ ॥ (२)

वारी जगत उदारण जागो भाई.....

दानवे दीदो दाव जुग में, राजा पकड़ी मून ओ । (२)

तारण वालो कुण स्वामी, सरब दुखी आ जून ओ ॥ (२)

वारी जगत उदारण जागो भाई.....

नकलंग नामे अनोपस्वामी, धरम सतरा पूत ओ । (२)

सोनी हरिचन्द परसीया, ओलख्राया दानव दूत ओ ॥ (२)

वारी जगत उदारण जागो भाई.....

राग-माड़ पृथ्वी प्रमाण भजन-७

वारी सुन-सुन पृथ्वी रा हरी गुण ओलखो भाई ।
 वारी आगम वेगम रा परीयाण में हे हे ॥
 गुरो से गुरु गम गुण पाविया भाई ॥ टेर ॥

पृथ्वी ओ परथम देव ज्यां, वद वद रचीया रूप ओ । (२)
 ज्यां रो पार देव न पाविया, सब भूप चंदा भूप ओ ॥ (२)
 वारी सुन-सुन पृथ्वी रा हरी गुण ओलखो भाई.....

जदी नहीं था विक्रम होम जुग में, नहीं था जादू जाप ओ । (२)
 देवत करते राज जुग में, धरम रे परताप ओ ॥ (२)
 वारी सुन-सुन पृथ्वी रा हरी गुण ओलखो भाई.....

पृथ्वी ओ मंडल बीच में, रखते ओ सतजुग चाल ओ । (२)
 अमस्त मीठा वेण ज्यांरे, धरम संदी ढाल ओ ॥ (२)
 वारी सुन-सुन पृथ्वी रा हरी गुण ओलखो भाई.....

वारी धरता ओ अंतर ध्यान सुन में, जगत सब जगदीश ओ । (२)
 कलाओ आदु जोवते, अंतर गढ़ रे बीच ओ ॥ (२)
 वारी सुन-सुन पृथ्वी रा हरी गुण ओलखो भाई.....

पृथ्वी ओ मंडल वरसता, इन्दर बारोही मास ओ । (२)
 ब्रह्मा ओ विष्णु महेश ज्यांने, लिखी अपरम्पार ओ ॥ (२)
 वारी सुन-सुन पृथ्वी रा हरी गुण ओलखो भाई.....

नकलंग नामे अनोप म्होय, सतगुरु मलिया श्याम ओ । (२)
 सोनी ओ हरिचन्द दाखवे, दिया अमर पद नाम ओ ॥ (२)
 वारी सुन-सुन पृथ्वी रा हरी गुण ओलखो भाई.....

राग-माड़ पृथ्वी प्रमाण भजन-८

वारी भजन उतपत आद अँकार को भाई ।
 वारीओ कूदरत ज्यां कैलाश में हे, हे ॥
 जोग जुगत कर हेरलो भाई ॥ टेर ॥

अगन जल वायु तीन गुण में, तत्व गुण प्रकाश ओ । (२)
 ज्यांरा ओ आतम रूप ज्यां में, चाले स्वास उसास ओ ॥ (२)
 वारी भजन उतपत आद अँकार को भाई.....

मडीयाणा नाभी कमल में, नकसिक नाड़ी देश ओ । (२)
 कर सर चालण पांव ज्यां में, नहीं है राया रेस ओ ॥ (२)
 वारी भजन उतपत आद अँकार को भाई.....

ज्यांरा संत सुमरण वे करें, दम-दम री दरकार ओ । (२)
 सुराओ करसी तोल ज्यांरा, त्रिलोकी रो भार ओ ॥ (२)
 वारी भजन उतपत आद अँकार को भाई.....

शंकर अंतर ध्यान कर कर, लख्रीया ससम वेद ओ । (२)
 जगत जोगी बांचते ज्यांरे, ब्रह्म से नहीं भेद ओ ॥ (२)
 वारी भजन उतपत आद अँकार को भाई.....

भजन द्वादश शील को, सरवण सुर में देख्र ओ । (२)
 तुई तुई त्रवणी सांद सुरती, बाहर भीतर एक ओ ॥ (२)
 वारी भजन उतपत आद अँकार को भाई.....

अनोपदासजी ब्रह्म ज्ञानी, भजन में भरपुर ओ । (२)
 सोनी ओ हरिचन्द सत भणे, ज्यांरे नित वरसे नूर ओ ॥ (२)
 वारी भजन उतपत आद अँकार को भाई.....

राग-मलार मोरीया भजन वाणी-१

वारीओ कबद ओ कागली वणसे ला थारो बाग ।

हेलो दिजे ओ मन मोरीया ओ जी ॥ टेर ॥ (२)

प्रथम समरुं सरस्वती ओ मांई, अधर अमर फल दीजिये ओ जी । (२)

मनसा ओ मोरली संजोवे ओ बीज, जल तो सीचो ओ मन मोरीया ओ जी ॥ (२)

वारीओ कबद ओ कागली वणसे ला थारो बाग.....

धरणी से अधर अधर धरणी मांय, बीजग ऊंगा ओ दरसे पांनरा ओ जी । (२)

थाणा सेवे ओ मनसा मोरली ओ, जल तो सीचो ओ मन मोरीया ओ जी ॥ (२)

वारीओ कबद ओ कागली वणसे ला थारो बाग.....

सतरा ओ रुख दया ओ संदी डाल, पछम पहांची ओ ज्यांरी डालीया ओ जी । (२)

मनसा ओ मोरली खमीया रो देवे खात, जल तो सीचो ओ मन मोरीया ओ जी ॥ (२)

वारीओ कबद ओ कागली वणसे ला थारो बाग.....

हरीया ओ पान पचरंग ज्यांरा फूल, फल तो पीला ओ रस आविया ओ जी । (२)

मनसा ओ मोरली जोयाओ डालम डाल, फल तो पाकाओ मन मोरीया ओ जी ॥ (२)

वारीओ कबद ओ कागली वणसे ला थारो बाग.....

दरखत अधर शीतल ज्यांरी छांय, फल तो उतारो मन मोरीया ओ जी । (२)

फल तो झेले ओ मनसा मोरली ओ, फल तो जीमो ओ मन मोरीया ओ जी ॥ (२)

वारीओ कबद ओ कागली वणसे ला थारो बाग.....

आप अनोप वे फल पाविया ओ, भक्ति बीजग लाया देश में ओ जी । (२)

सोनी हरिचन्द वे फल सेविया, फल तो मीटा ओ मन मोरीया ओ जी ॥ (२)

वारीओ कबद ओ कागली वणसे ला थारो बाग.....



राग-मलार सुवटा भजन वाणी-२

भाईरां कर लेजो करणी चढोला निरवाण ।

तुई तुई लव लावो आतम सुवटा ओ जी ॥ टेर ॥ (२)

आद विचारो आतम सुवटा ओ, माला फेरो ओ निज नाम री ओ जी । (२)

सुरता ओ सुवटी करेला थांरी सेव, सद मन राखो ओ सुआ सुवटा ओ जी ॥ (२)

भाईरां कर लेजो करणी चढोला निरवाण.....

जोडी जे पांव पदम आसण पाठ, निर्भय थरपो ओ थांणा नाभ में ओ जी । (२)

सुरता ओ सुवटी सांदेला थांरी डोर, शिखर चढीजे सुआ सुवटा ओ जी ॥ (२)

भाईरां कर लेजो करणी चढोला निरवाण.....

थांरी पांखों में पवना उरद मुख डोर, अधर आवे ओ पंछी झूलता ओ जी । (२)

सुरता ओ सुवटी झाली है थांरी डोर, सगम चढो ओ सुआ सुवटा ओ जी ॥ (२)

भाईरां कर लेजो करणी चढोला निरवाण.....

भंवर गुफा में बाजे ओ झणकार, नेवर बाजे ओ पंछी पांव में ओ जी । (२)

सुरता ओ सुवटी सजेला सणगार, पंछी जोवो ने थांरो पीजरो ओ जी ॥ (२)

भाईरां कर लेजो करणी चढोला निरवाण.....

दीपक चार अखंड ज्योरी ज्योत, बीच में झूले ओ पंछी पीजरो ओ जी । (२)

सुरता ओ सुवटी चलावे ओ डोर, हीण्डे हीचो ओ हरिया सुवटा ओ जी ॥ (२)

भाईरां कर लेजो करणी चढोला निरवाण.....

आप अनोप अंतर ध्यान से ओ, पंछी पढायो बोब्ब प्रेम से ओ जी । (२)

सोनी हरिचन्द सेब्यो सुवटो ओ, सेवा करती ओ सुरता सुवटी ओ जी ॥ (२)

भाईरां कर लेजो करणी चढोला निरवाण.....



राग-मलार कोयलरो भजन वाणी-३

वारीओ कृष्ण कोयलरो चेतन ज्यांरो नाम,
सुखमण करणी ओ करती कोयलरी ओ जी ॥ टेर ॥ (२)

आद बीजग जल जाणीये ओ, रचीया ब्रह्मांड खंड आतमा ओ जी ॥ (२)
पांच तत्व गुण तीन में ओ, करणी करे ओ तपसी कोयलरो ओ जी ॥ (२)
वारीओ कृष्ण कोयलरो चेतन ज्यांरो नाम.....

भजन जगाड़ो जोगी भोम से ओ, चढ़िया कुंभक रेचक उतरे ओ जी ॥ (२)
घाट-ओ-घट वकमी वाट में ओ, करणी करे ओ तपसी कोयलरो ओ जी ॥ (२)
वारीओ कृष्ण कोयलरो चेतन ज्यांरो नाम.....

सूरा नर तपसी ओ दोनु भेटिया ओ, मलिया त्रवणी चंदा मेल में ओ जी ॥ (२)
उलट-सुलट ऊँकार में ओ, करणी करे ओ तपसी कोयलरो ओ जी ॥ (२)
वारीओ कृष्ण कोयलरो चेतन ज्यांरो नाम.....

हीरा जड़िया ओ सुन महेल में ओ, निरंजन ज्योति ओ दरसे जागता ओ जी ॥ (२)
घण-घण घंटा वाजे ओ वेगम तार, करणी पाया ओ दरशण कोयलरो ओ जी ॥ (२)
वारीओ कृष्ण कोयलरो चेतन ज्यांरो नाम.....

अणबे वाजा ओ ज्यांरे वाजिया ओ, मादी नर आया ओ दोनु महेल में ओ जी ॥ (२)
वटे चोपट मांडी है सत नाम री ओ, करणी जीता ओ आतम कोयलरो ओ जी ॥ (२)
वारीओ कृष्ण कोयलरो चेतन ज्यांरो नाम.....

अनोपस्वामी ओ स्मीया सोगटे ओ, द्वादश जीता ओ सुन महेल में ओ जी ॥ (२)
सोनी हरिचन्द पासा झेलिया ओ, अणबे सुरसत बाजी तीन में ओ जी ॥ (२)
वारीओ कृष्ण कोयलरो चेतन ज्यांरो नाम.....



राग-मलार हंसलो भजन वाणी-४

वारीओ अणबे ओ हंसली हंसा ओ वचन रूप,
मगन करणी सूं मोती पाविया ओ जी ॥ टेर ॥ (२)

अखंड जरणी ओ आदु ओलखो ओ, जरणी देवे ओ अन्न फल फुलडां ओ जी ॥ (२)
सपत दीप ओ नव द्वार में ओ, दस में दरसे ओ मोती सायर में ओ जी ॥ (२)
वारीओ अणबे ओ हंसली हंसा.....

पछम दिशा सूं आवे वादली ओ, पवना आवे ओ मेरु पहाड़ से ओ जी ॥ (२)
हंसली हंसा सूं करे ओ ललकार, हालो हंसा ओ संदु सायर में ओ जी ॥ (२)
वारीओ अणबे ओ हंसली हंसा.....

हद से बेहद में गाजे ओ गेरो गाज, मदरी वरसे ओ हंसा वादली ओ जी ॥ (२)
हंसली हंसा सूं करे ओ ललकार, मोती बेला ओ हंसा सायर में ओ जी ॥ (२)
वारीओ अणबे ओ हंसली हंसा.....

छूटा शीलर सरवर भेटीया ओ, हंसा बसे ओ संदु सायर में ओ जी ॥ (२)
वरसे वादल मोती नीपजे ओ, अखंड उजाला शीतल रोशनी ओ जी ॥ (२)
वारीओ अणबे ओ हंसली हंसा.....

हंसे हीडा ओ वठे घालिया ओ, गगन मंडल रे ओ गोख्र में ओ जी ॥ (२)
लहेरा लेवे ओ हंसा हंसली ओ, मोती पाया ओ अमर लोक में ओ जी ॥ (२)
वारीओ अणबे ओ हंसली हंसा.....

अनोपस्वामी ओ सायर भेटीया ओ, मोती पाया ओ नीज नाम रा ओ जी ॥ (२)
सोनी हरिचन्द मोती सेवीया ओ, मोती चगे ओ हंसा हंसली ओ जी ॥ (२)
वारीओ अणबे ओ हंसली हंसा.....



राग-मलार कुकड़ा भजन वाणी-५

वारीओ करणी सेवे ओ कूदरत कूकड़ी ओ,
जोग जगाड़ो केवल कूकड़ा ओ जी ॥ टेर ॥ (२)

पस्थम पहोरे ओ तारा तेज में ओ, दूजे दरसे ओ चंदा शोभता ओ जी ॥ (२)
तीजे पहोरे ओ जोगी जागता ओ, भजन जगाड़ो केवल कूकड़ा ओ जी ॥ (२)
वारीओ करणी सेवे ओ कूदरत कुकड़ी.....

गंगा खलके ओ उलटी भोम से ओ, आवे सुखमण सोरम घाट से ओ जी ॥ (२)
जोगी न्हावे ओ निरमल नीर में ओ, भजन जगाड़ो केवल कूकड़ा ओ जी ॥ (२)
वारीओ करणी सेवे ओ कूदरत कुकड़ी.....

चादर धोवे ओ त्रवणी तीर पे ओ, भस्मी चढ़ावे जोगी भाव री ओ जी ॥ (२)
अखरे ओ मंडल आसण पूरीया ओ, भजन जगाड़ो केवल कूकड़ा ओ जी ॥ (२)
वारीओ करणी सेवे ओ कूदरत कुकड़ी.....

गंगा हर गोमती बरसे ओ अमृत धार, चौथा पदमे ओ सूरज उगता ओ जी ॥ (२)
वटे साजे समाधी जोगी सुन में ओ, भजन जगाड़ो केवल कूकड़ा ओ जी ॥ (२)
वारीओ करणी सेवे ओ कूदरत कुकड़ी.....

परदे बजावे जोगी बंसरी ओ, आगम वेगम रे ओ बीच में ओ जी ॥ (२)
केवल कूदरत एकण तीर पे ओ, निर्भय परसी ओ केवल कूकड़ा ओ जी ॥ (२)
वारीओ करणी सेवे ओ कूदरत कुकड़ी.....

अनोपस्वामी ओ न्हाया गंग में ओ, निर्भय गंगाओ न्हाई नाम से ओ जी ॥ (२)
सोनी हरिचन्द सोरम घाट पे ओ, भजन जगाड़ो केवल कूकड़ा ओ जी ॥ (२)
वारीओ करणी सेवे ओ कूदरत कुकड़ी.....



राग-देश गणपति भजन वाणी-१

वारी अलखराज में आगलवाणी, जुग में दरसण देसी ओ गुणपतजी ॥२॥

वारी सब गुण दीजो स्वामीजी ॥ टेरे ॥

वारी सदा गुणपती शीश नमावुं, आदगुणी उपदेसी ओ गुणपतजी ॥२॥

वारी सब गुण दीजो स्वामीजी ॥

वारी अलख राज में आगलवाणी.....

वारी नकलंग पाठ निरंजन पूजा, ज्यां गुणपती बेसी ओ गुणपतजी ॥२॥

वारी सब गुण दीजो स्वामीजी ॥

वारी अलख राज में आगलवाणी.....

वारी आतम से ॐकार जगावो, सोचन शिखर जाय रेसी ओ गुणपतजी ॥२॥

वारी सब गुण दीजो स्वामीजी ॥

वारी अलख राज में आगलवाणी.....

वारी स्वासे स्वास समरणा फेरो, थांरी आप अरज सुण लेसी ओ गुणपतजी ॥२॥

वारी सब गुण दीजो स्वामीजी ॥

वारी अलख राज में आगलवाणी.....

वारी अनोपदास गुणवंती बाबो, समरियां सब गुण देसी ओ गुणपतजी ॥२॥

वारी सब गुण दीजो स्वामीजी ॥

वारी अलख राज में आगलवाणी.....

वारी सोनी हरिचन्द करे वीणती, गुणपत लीला ऐसी ओ गुणपतजी ॥२॥

वारी सब गुण दीजो स्वामीजी ॥

वारी अलख राज में आगलवाणी.....



राग-देश पंडतजी भजन वाणी-२

वारी रळी फरे तो संग में राख्रो, हरदम दीजे हेलो ओ पंडतजी ॥२॥

वारी अमर नाम ओलख्रावीजे ॥ टेर ॥

वारी सुरत वावली नही समझे तो, अलख्र अख्राड़े मेलो ओ पंडतजी ॥२॥

वारी अमर नाम ओलख्रावीजे ॥

वारी रळी फरे तो संग में राख्रो.....

वारी सुद बुद संख्या शील भणावो, पछे भजन भणावो सेला ओ पंडतजी ॥२॥

वारी अमर नाम ओलख्रावीजे ॥

वारी रळी फरे तो संग में राख्रो.....

वारी पांच कला री मोटी महिमा, पांचों रो परचेलो ओ पंडतजी ॥२॥

वारी अमर नाम ओलख्रावीजे ॥

वारी रळी फरे तो संग में राख्रो.....

वारी अलख्र अख्राड़े भणीया वोतो, सदर चौक में खेलो ओ पंडतजी ॥२॥

वारी अमर नाम ओलख्रावीजे ॥

वारी रळी फरे तो संग में राख्रो.....

वारी अनोपदास बाबारी कलमों, झेल सको तो झेलो ओ पंडतजी ॥२॥

वारी अमर नाम ओलख्रावीजे ॥

वारी रळी फरे तो संग में राख्रो.....

वारी सोनी हरिचन्द सूरत भणार्ई, ज्यांमे कुण गुरु कुण चेला ओ पंडतजी ॥२॥

वारी अमर नाम ओलख्रावीजे ॥

वारी रळी फरे तो संग में राख्रो.....



राग-देश आलमजी भजन वाणी-३

वारी अंत आकड़ो भीतर भरीयो, ज्योने कण वद होवे ओ मालुम जी ॥(२)

वारी अमर प्याला पीवीजे ॥ टेर ॥

वारी केवल नाम कूदरती माला, थारे देवल मांय दरसीजे ओ आलमजी ॥(२)

वारी अमर प्याला पीवीजे ॥

वारी अंत आकड़ो भीतर भरीयो.....

वारी पांच मार परदा में रेवे, वटे पांचों सूं परसीजे ओ आलमजी ॥(२)

वारी अमर प्याला पीवीजे ॥

वारी अंत आकड़ो भीतर भरीयो.....

वारी तिरगुण तंत, तंत तिरगुण में, वटे जुमले कर जोवीजे ओ आलमजी ॥(२)

वारी अमर प्याला पीवीजे ॥

वारी अंत आकड़ो भीतर भरीयो.....

सुखमण भांण, भांण सुखमण में, दीपक वां दरसीजे ओ आलमजी ॥(२)

वारी अमर प्याला पीवीजे ॥

वारी अंत आकड़ो भीतर भरीयो.....

वारी अनोपदास आनंदी जोगी, वटे पूरां सूं परसीजे ओ आलमजी ॥(२)

वारी अमर प्याला पीवीजे ॥

वारी अंत आकड़ो भीतर भरीयो.....

वारी सोनी हरिचन्द पिया अमीरस, वटे वादलियां वरसीजे ओ आलमजी ॥(२)

वारी अमर प्याला पीवीजे ॥

वारी अंत आकड़ो भीतर भरीयो.....



राग-देश साधुजी भजन वाणी-४

वारी कबद शंकणी कोरी टालो, हसूं हवा मिलावो ओ साधुजी ॥२॥

वारी निरगुण माला फेरीजे ॥ टेर ॥

वारी मूल कमल पर आसण पुरो, त्रवणी में तार मिलावो ओ साधुजी ॥२॥

वारी निरगुण माला फेरीजे ॥

वारी कबद शंकणी कोरी टालो.....

वारी नेतर दोय नासका माथे, सुर से सूरत मिलावो ओ साधुजी ॥२॥

वारी निरगुण माला फेरीजे ॥

वारी कबद शंकणी कोरी टालो.....

वारी सुर का मणीया पवन तार में, दम दम शिखर चढ़ावो ओ साधुजी ॥२॥

वारी निरगुण माला फेरीजे ॥

वारी कबद शंखणी कोरी टालो.....

वारी उरद अजंपा रटो रीत से, झलमल ज्योत जगावो ओ साधुजी ॥२॥

वारी निरगुण माला फेरीजे ॥

वारी कबद शंकणी कोरी टालो.....

वारी अनोपदास अलखरी पूजा, सोवन शिखर सत लावो ओ साधुजी ॥२॥

वारी निरगुण माला फेरीजे ॥

वारी कबद शंकणी कोरी टालो.....

वारी सोनी हरिचन्द जपे अजंपा, उलट अमर पद पावो ओ साधुजी ॥२॥

वारी निरगुण माला फेरीजे ॥

वारी कबद शंकणी कोरी टालो.....

राग-बरहन जोगाराम भजन वाणी-१

मूरख मरम सवाद नहीं जाणे, मिठी लागे छे के मोली ।
ओ संतो भाई लावा धरम रा लोरी, ज्ञान से पीवो अमीरस खोली ॥ टेर ॥

परथम देव गणपती पूजो, भजो सरस्वती भोली, (२)
सुमरे ज्यांने सुद्ध-बुद्ध देवे, दारी फिरे से दोली । (२)
ओ संतो भाई लावा धरम रा लोरी, ज्ञान से पीवो अमीरस खोली ॥
मूरख मरम सवाद नहीं जाणे.....

जोगी हुआ जुगत नहीं जाणे, झाली हाथ में झोळी, (२)
गुरुगम और खबर नहीं गुण की, फिरे पराई पोळी । (२)
ओ संतो भाई लावा धरम रा लोरी, ज्ञान से पीवो अमीरस खोली ॥
मूरख मरम सवाद नहीं जाणे.....

समरण करो समझ मांय वेतो, लखो अलखजीरी ओळी, (२)
उलट अमीरस पीओ उरद से, जहर दूर जाय ढोळी । (२)
ओ संतो भाई लावा धरम रा लोरी, ज्ञान से पीवो अमीरस खोली ॥
मूरख मरम सवाद नहीं जाणे.....

वारी दीपक जोय दुरस कर देवल, करो कबद की होळी, (२)
झूटा काल जवर में झालो, पछे रमो रंग रोळी । (२)
ओ संतो भाई लावा धरम रा लोरी, ज्ञान से पीवो अमीरस खोली ॥
मूरख मरम सवाद नहीं जाणे.....

आसण अधर अखंडी देवा, झलके ज्योत पीली धोळी, (२)
दया हुई जद दरशण पाया, धणी लिया मोय टोळी । (२)
ओ संतो भाई लावा धरम रा लोरी, ज्ञान से पीवो अमीरस खोली ॥
मूरख मरम सवाद नहीं जाणे.....

वारी आप अनोप मलिया गुरु पूरा, समझ बताई बोळी, (२)
सोनी हरिचन्द पीया अमीरस, भरा प्याला सोळी । (२)
ओ संतो भाई लावा धरम रा लोरी, ज्ञान से पीवो अमीरस खोली ॥
मूरख मरम सवाद नहीं जाणे.....

राग-बरहन जोगाराम भजन वाणी-२

जड़ चेतन और सरब बीज की धरण मात दातारी ।

ओ निरंजन, गुणपतजी गुण धारी संत सब सेवा करो विचारी ॥ टेर ॥

वारी परथम पाठ परम पद पूजा, गुणपत आसण धारी, (२)

सरब जून ज्यांरे अंग में उपजी, सबका सिरजन हारी (२)

ओ निरंजन, गुणपतजी गुणधारी संत सब सेवा करो विचारी ॥

जड़ चेतन और सरब बीज की.....

परगट ज्योत सरासर दरसे, वद-वद कुल वसतारी, (२)

पांच तंत गुण तीन आठ में, न्याय तणो निरधारी (२)

ओ निरंजन, गुणपतजी गुणधारी संत सब सेवा करो विचारी ॥

जड़ चेतन और सरब बीज की.....

वारी गुण को जाणे सोई गुणपती, आप तरे और तारी, (२)

लख चौरासी जून सब गुण की, गुण का नर और नारी (२)

ओ निरंजन, गुणपतजी गुणधारी संत सब सेवा करो विचारी ॥

जड़ चेतन और सरब बीज की.....

वारी भागे भरम भेद जद पावे, घर जोया गिरधारी, (२)

उतपत और देख उण घर की, कूदरत में किरतारी (२)

ओ निरंजन, गुणपतजी गुणधारी संत सब सेवा करो विचारी ॥

जड़ चेतन और सरब बीज की.....

वारी वरसालो बसती में वरसे, घोर पड़े घणधारी, (२)

परथम गुणी पृथ्वी दरसे, आतम रो आधारी (२)

ओ निरंजन, गुणपतजी गुणधारी संत सब सेवा करो विचारी ॥

जड़ चेतन और सरब बीज की.....

वारी आप अनोप जगत का वारु, अदल न्याय अवतारी, (२)

सोनी हरिचन्द गुणपत पूज्या, गुण की बात विचारी (२)

ओ निरंजन, गुणपतजी गुणधारी संत सब सेवा करो विचारी ॥

जड़ चेतन और सरब बीज की.....

राग-बरहन जोगाराम भजन वाणी-३

तीन पांच में करणी करलो फेर जनम नहीं आसी ओ,
धरम की फेरो समरणा साची, जनम तक वधन काल टल जासी ॥ टेर ॥

वारी आदु कला तो अमरपति में, मरण कला सब काची, (२)
भजन कला भगती में दरसे, जोग कला वनवासी । (२)
ओ धरम की फेरो समरणा साची, जनम तक वधन काल टल जासी ॥
तीन पांच में करणी करलो फेर.....

वारी गरव झूठ और काल तीसरो, कबदथा दबदण दासी, (२)
पर धन पाप सभी में सामिल, करे धरम की नासी । (२)
ओ धरम की फेरो समरणा साची, जनम तक वधन काल टल जासी ॥
तीन पांच में करणी करलो फेर.....

वारी हरिजन हौज भरा हीरदा में, निरमल नीर नवासी, (२)
पांचोई कपड़ा धोय लो जल में, सरब दाग मिट जासी । (२)
ओ धरम की फेरो समरणा साची, जनम तक वधन काल टल जासी ॥
तीन पांच में करणी करलो फेर.....

चंद्र-भांण दोय दम की ज्योता, आठ पहर उजासी, (२)
गगन मंडल घड़ीयालां वाजे, जण घर जाय समासी । (२)
ओ धरम की फेरो समरणा साची, जनम तक वधन काल टल जासी ॥
तीन पांच में करणी करलो फेर.....

वारी नाभी कमल में नौपत बाजे, तीन गुण नरवासी, (२)
तीन गुणों में तीरगुण माला, फेरो स्वास उसासी । (२)
ओ धरम की फेरो समरणा साची, जनम तक वधन काल टल जासी ॥
तीन पांच में करणी करलो फेर.....

वारी आप अनोप अमर पद पाया, उगम देश उमासी, (२)
सोनी हरिचन्द फेरी समरणा, लगन मगन होय जासी । (२)
ओ धरम की फेरो समरणा साची, जनम तक वधन काल टल जासी ॥
तीन पांच में करणी करलो फेर.....

राग-बरहन जोगाराम भजन वाणी-४

नत पत नीर नाम से सींचो करम पाप दूर टाली ओ,
वचन से राख्रो सुरत रखवाली जोवो पछे पान फूल फल डाली ॥ टेर ॥

वारी आदु बीज अदल कर खेती, बांधो प्रेम की पाली, (२)
मकर मूल वा तो बारे काड़ो, थारे हळ खेड़े मनमाली । (२)
ओ वचन से राख्रो सुरत रखवाली जोवो पछे गोड़ फूल फल डाली ॥

नत पत नीर नाम से सींचो करम.....

वारी हद में वायो हेत से ऊंगे, वाजी तणों में ताली, (२)
सुरत सुहागण फरे बाग में, उड़ाई कागली काली । (२)
ओ वचन से राख्रो सुरत रखवाली जोवो पछे गोड़ फूल फल डाली ॥

नत पत नीर नाम से सींचो करम.....

वारी उंगा बीज अधर फल लागा, लिया ब्रह्म सूं भाली, (२)
शीतल खेत वादली बरसे, पाणी आवे परनाली । (२)
ओ वचन से राख्रो सुरत रखवाली जोवो पछे गोड़ फूल फल डाली ॥

नत पत नीर नाम से सींचो करम.....

वारी पाका आम रंग में पीला, आदु आम रसाली, (२)
अदर अमर फल कोई एक लेवे, ज्यांरे अंग में ज्योत उजाली । (२)
ओ वचन से राख्रो सुरत रखवाली जोवो पछे गोड़ फूल फल डाली ॥

नत पत नीर नाम से सींचो करम.....

वारी सतरा आम सुगन में परगट, तीन पांच दस डाली, (२)
जीमत लगे अमर फल मीठा, सोवन वरण सुआली । (२)
ओ वचन से राख्रो सुरत रखवाली जोवो पछे गोड़ फूल फल डाली ॥

नत पत नीर नाम से सींचो करम.....

वारी आप अनोप अमर फल पाया, तोड़ी जगत की जाली, (२)
सोनी हरिचन्द लिया अमर फल, सत गुरुजी री बलिहारी । (२)
ओ वचन से राख्रो सुरत रखवाली जोवो पछे गोड़ फूल फल डाली ॥

नत पत नीर नाम से सींचो करम.....

राग-पीलु अजरी सरबंग भजन-१

पड़रक मंतर समर अगोरी, अजर प्याला पीजे ओ सरबंग ।

अजरी अणवद रीजे हो, हो जी ॥ टेर ॥

अजरा आद उगम से बरसे, भर प्याला भर लीजे हो हो जी । (२)

पड़ प्याला परसण कर सरबंग, दल देवन कुं दीजे ओ सरबंग ॥ (२)

अजरी अण वद रीजे हो हो जी ॥ पड़रक मंतर समर अगोरी.....

उलटी नाल अखंडी दरशण, सुलटी सरबंग कीजे हो हो जी । (२)

वारी खिड़की खोल खबर कर उणकी ओ, उलट अमीरस पीजे ओ सरबंग ॥ (२)

अजरी अण वद रीजे हो हो जी ॥ पड़रक मंतर समर अगोरी.....

वारी सपने चोर वघन नहीं ब्यापे, छल मातर चमकीजे हो हो जी । (२)

मुख मंजन मुगत का प्याला, दगलबाज कुं न दीजे ओ सरबंग ॥ (२)

अजरी अण वद रीजे हो हो जी ॥ पड़रक मंतर समर अगोरी.....

वारी उलटी तेजी, सुलटी अतेजी, दोए कळ लखलीजे हो हो जी । (२)

दिल परसण कर कर दरसण कुं, हरदम हुकम रखीजे ओ सरबंग ॥ (२)

अजरी अण वद रीजे हो हो जी ॥ पड़रक मंतर समर अगोरी.....

वारी सरबंग पाक सरबंग मेला, दोए सरबंग दरसीजे हो हो जी । (२)

उजल पाक अलख घर आदर, परम ज्योत परसीजे ओ सरबंग ॥ (२)

अजरी अण वद रीजे हो हो जी ॥ पड़रक मंतर समर अगोरी.....

वारी अनोपदास गुरु हद-बे-हद में, खुश रूपी खेलीजे हो हो जी । (२)

सोनी हरिचन्द दोए दुस कर, जुगती सुं झेलीजे ओ सरबंग ॥ (२)

अजरी अण वद रीजे हो हो जी ॥ पड़रक मंतर समर अगोरी.....



राग-पीलु सरसत सरबंग भजन-२

वारी आद अगोरी अमर पद पड़कर, धरणी में धार मिलावुं ओ सरबंग ।
अजरा उलट समावुं हो हो जी ॥ टेरे ॥

सरस्वत माई प्रेम कर पूजु, गणपत देव मनावुं हो हो जी । (२)
सुद-बुद सरबंग दीजो हो देवी, प्रेम प्याला पावु ओ जोगण ॥ (२)
अजरा उलट समावुं हो हो जी ॥ वारी आद अगोरी अमर पद पड़कर.....

वारी गुदा चकर की गंदण मेदु, सोरम घाट चलावु हो हो जी । (२)
जंतर जोग जुगत कर जोवुं, रोम रोम रंग लावुं ओ जोगण ॥ (२)
अजरा उलट समावुं हो हो जी ॥ वारी आद अगोरी अमर पद पड़कर.....

वारी नल कमल की नाड़ चलावुं, दरदी दूर हटावुं हो हो जी । (२)
भीतर जोए भरम कूं तोडूं, अंतर अगन पचावुं ओ जोगण ॥ (२)
अजरा उलट समावुं हो हो जी ॥ वारी आद अगोरी अमर पद पड़कर.....

वारी जात अजात जगत नहीं जांसुं, नहीं कोई नगर सतावुं हो हो जी । (२)
मुसदा देव मुस्त नहीं पूजु, झलमल ज्योत जगावुं ओ जोगण ॥ (२)
अजरा उलट समावुं हो हो जी ॥ वारी आद अगोरी अमर पद पड़कर.....

वारी नव दरवाजे सरबंग चौकी, दसमें शंख्र बजावुं हो हो जी । (२)
सरबंग देव सकल में दरसे, दिन-दिन दरशण पावुं ओ जोगण ॥ (२)
अजरा उलट समावुं हो हो जी ॥ वारी आद अगोरी अमर पद पड़कर.....

वारी अनोपदास सरबंगी बाबो, ज्यां कूं शीश नमावुं हो हो जी । (२)
सोनी हरिचन्द अजर जगाया, उलट अमर पद पावुं ओ जोगण ॥ (२)
अजरा उलट समावुं हो हो जी ॥ वारी आद अगोरी अमर पद पड़कर.....



राग-पीलुं अजरा सरबंग भजन-३

वारी पीया प्याला मन मतवाला, निर्भय नशा चढाया ओ सरबंग ।
अजरावां उलटाया हो हो जी ॥ टेर ॥

वारी आदु भजन अनादी भगती, उण घर अजरा पाया हो हो जी । (२)
ज्ञान ध्यान गुरुगम सब साथे, अगम भोम ओलखाया ओ सरबंग ॥ (२)
अजरावां उलटाया हो हो जी ॥ वारी पीया प्याला मन मतवाला.....

वारी उगम देश नुरगुण परगासा, ज्यां सरबंगी माया हो हो जी । (२)
चश्मा लगा सुरत कूं सांदी, दरवाजा दरसाया ओ सरबंग ॥ (२)
अजरावां उलटाया हो हो जी ॥ वारी पीया प्याला मन मतवाला.....

वारी चेतन कला समझ की कूंची, दरवाजे पर आया हो हो जी । (२)
लग गई कूंची तुट गया फंदा, खट मंदर खोलाया ओ सरबंग ॥ (२)
अजरावां उलटाया हो हो जी ॥ वारी पीया प्याला मन मतवाला.....

वारी शशी और भांण देवल में दरसे, तारा मंडल छाया हो हो जी । (२)
अण देवल में अखंडी देवा, कर दरसन गुण पाया ओ सरबंग ॥ (२)
अजरावां उलटाया हो हो जी ॥ वारी पीया प्याला मन मतवाला.....

वारी अलख अखाड़े वाजा वाजे, वरगु और शहेनाइयां हो हो जी । (२)
अणबे नाद गगन में गरजे, घड़ियाला घरणाया ओ सरबंग ॥ (२)
अजरावां उलटाया हो हो जी ॥ वारी पीया प्याला मन मतवाला.....

वारी अनोपदास सरबंग में खेले, सरबंग भोग चढाया हो हो जी । (२)
सोनी हरिचन्द फेरी समरणा, सूता देव जगाया ओ सरबंग ॥ (२)
अजरावां उलटाया हो हो जी ॥ वारी पीया प्याला मन मतवाला.....



राग-पीलु धरणी सरबंग भजन-४

वारी हर भगती हिरदे में रखना, दिल में रखो दिलासा ओ सरबंग ।
खेलो नाम खुलाशा हो हो जी ॥ टेर ॥

धरणी आद जगत को दरसे, ज्यां सरबंग प्रकाशा हो हो जी । (२)
जाजम ढली कूदरती चौड़े, आतम तणा रंग रासा ओ सरबंग ॥ (२)
खेलो नाम खुलाशा हो हो जी ॥ वारी हर भगती हिरदे में रखना.....

वारी सोला का तो सकल पसारा, बारा में सुख वासा हो हो जी । (२)
नव खंड में नरभे सरबंगी, सपत दीप आकाशा ओ सरबंग ॥ (२)
खेलो नाम खुलाशा हो हो जी ॥ वारी हर भगती हिरदे में रखना.....

वारी सरबंग धरणी सरबंग जरणी, सरबंग गर्भ निवासा हो हो जी । (२)
शशी और भाण सरबंग में दरसे, सरबंग स्वास उसासा ओ सरबंग ॥ (२)
खेलो नाम खुलाशा हो हो जी ॥ वारी हर भगती हिरदे में रखना.....

वारी किरतन गाना दम उलटाणा, तन में करो तपासा हो हो जी । (२)
ॐ सो ॐ सरबंग में बोले, सरबंग घट घट वासाओ सरबंग ॥ (२)
खेलो नाम खुलाशा हो हो जी ॥ वारी हर भगती हिरदे में रखना.....

वारी नेकी धरम घणी कर जाणों, राखो मन विश्वासा । (२)
मालिक माला सरबंग में दरसे, समरण करलो स्वासा ओ सरबंग ॥ (२)
खेलो नाम खुलाशा हो हो जी ॥ वारी हर भगती हिरदे में रखना.....

अनोपदास सुरा सिद्ध जोगी, करणी में कैलाशा हो हो जी । (२)
सोनी हरिचन्द लखे सदर में, हिरदे बहोत हुलासा ओ सरबंग ॥ (२)
खेलो नाम खुलाशा हो हो जी ॥ वारी हर भगती हिरदे में रखना.....



राग-पीलु सुरता सरबंग भजन-५

वारी रमझम फरती खेल करंती, अमर रुकड़ी पीधी ओ गुरु ।

करी सुरत को सीधी ॥ टेर ॥

वारी आद जुगाद अनादी रुकड़ी, लगन सरूपी लीधी हो हो जी । (२)

पहेली सत गुरु आप चढाई, पछे दुरस कर दीधी ओ गुरु ॥ (२)

करी सुरत को सीधी हो हो जी ॥ वारी रमझम फरती खेल करंती.....

वारी खुश में खेल खलक में फरती, आद भजन सूं ऐदी हो हो जी । (२)

अंग आलस मरोडा मुख्र में, रंग लगाती मेंदी ओ गुरु ॥ (२)

करी सुरत को सीधी हो हो जी ॥ वारी रमझम फरती खेल करंती.....

वारी चेतन पुरुष बसे गढ़ भीतर, सुरत वीणती कीदी हो हो जी । (२)

हाथ जोड़ कर हाजर उभी, ऐब अलग कर दीधी ओ गुरु ॥ (२)

करी सुरत को सीधी हो हो जी ॥ वारी रमझम फरती खेल करंती.....

वारी सुन घर सुरती तार मिलाया, लव लाला कूं वीधी हो हो जी । (२)

दल दरियाव भरा मन मोती, खबरी लाल खरीदी ओ गुरु ॥ (२)

करी सुरत को सीधी हो हो जी ॥ वारी रमझम फरती खेल करंती.....

वारी सुरता सख्री सदर में आई, फर-फर लाला फेदी हो हो जी । (२)

मूरख मरम मोल नहीं समझे, जवेरी सुग-सुग लीधी ओ गुरु ॥ (२)

करी सुरत को सीधी हो हो जी ॥ वारी रमझम फरती खेल करंती.....

वारी आप अनोप देव पद पाया, आद भजन का भेदी हो हो जी । (२)

सोनी हरिचन्द गुण समझाया, आद समरणा लीधी ओ गुरु ॥ (२)

करी सुरत को सीधी हो हो जी ॥ वारी रमझम फरती खेल करंती.....



राग-रासड़ा भजन-१

इलामल जोवते काई, किसी का मानते नांही,
हो इलामल जोवते काई, किसी का मानते नांही ॥ टेर ॥

पूरण भगती प्रेम की ओ वीरा, दुविद्या से आ दूर । (२)
रास मंडल में रास्ती खेलो, छोड़ दो कपट कूड़ ॥
इलामल जोवते काई.....

वातौरा घणां आगला हो थे, विद्या में भरपुर । (२)
लक्ष्मी में लपटीजिया ओ, थारे अंतर दीसे कूड़ ॥
इलामल जोवते काई.....

अंग थी घणा उजला हो थे, बांयों से बलदार । (२)
दया धरम तो जाणते नही, ने देखियो है कलदार ॥
इलामल जोवते काई.....

आतमा रा दरशण करो थे, सत रा कीजो काम । (२)
दया बुद्धि वरतीत करो, थोरो अमर रेसी नाम ॥
इलामल जोवते काई.....

भगती कीजो भाव से रे भाई, सुणजो दोनुई कान । (२)
प्रेम करने बुजजोरे भाई, सतगुरां री श्यान ॥
इलामल जोवते काई.....

अनोपस्वामी पूरण मलिया, दिया दीपक जोय । (२)
सोनी हरिचन्द प्रेम से गाया, श्यान बताई मोय ॥
इलामल जोवते काई.....

राग-रासड़ा भजन-२

राजेश्वर न्याय को झेलो, धणी मारा सुणजो हेलो ।
हो राजेश्वर न्याय को झेलो, धणी मारा सुणजो हेलो ॥ टेर ॥

जालिये जाल जगत में कीदो, गत में पाड़ी फूट । (२)
पृथ्वी नामे पाप चलायो, मांडी है लूटा लूट ॥
राजेश्वर न्याय को झेलो.....

गरु सींगार खुराक में आणी, जालिया संदो काम । (२)
मुमती वाळ साद चलाया, तोड़ते धरम नाम ॥
राजेश्वर न्याय को झेलो.....

दंड गरुआं पर दंड भैसो पर, दंडी अज्या ढोर । (२)
रतनों ऊपर कलंक लगाया, संत कूं कीधा चोर ॥
राजेश्वर न्याय को झेलो.....

जालिये मानव बुध कूं फेरी, जालिये कीधा चोर । (२)
गरु अज्या पर घात चलावी, मारते कुक्कड़ मोर ॥
राजेश्वर न्याय को झेलो.....

लख चौरासी जून कूं तारो, बांधलो धरम कार । (२)
प्रेम करे धणी पृथ्वी तारो, सांभलो सिरजनहार ॥
राजेश्वर न्याय को झेलो.....

अनोपस्वामी पूरण मलिया, श्यान बताई मोय । (२)
सोनी हरिचन्द न्याय सरुपी, शीश नमावुं तोय ॥
राजेश्वर न्याय को झेलो.....

रास-रासड़ा भजन-३

धणी मारा आवजो वारु, जीवोंने तारवा सारु ।

हो धणी मारा आवजो वारु, जीवोंने तारवा सारु ॥ टेर ॥

आप बड़ा हो आप अखंडी, आप उपावन हार । (२)

आपका रूप में आप समाया, आप ही हो अवतार ॥

धणी मारा आवजो वारु.....

आप जड़ चेतन में बोलो, आप हो तस्वर पात । (२)

आप तेजी में आप कूंजर में, आप निरंजन नाथ ॥

धणी मारा आवजो वारु.....

आप उगम हो आप वायु में, आप हो शीतल तेज । (२)

आप पृथ्वी में प्राण बसाया, आप देराया देश ॥

धणी मारा आवजो वारु.....

आप गऊओ में आप अज्या में, आप हो वाड़ी वेल । (२)

लख्र चौरासी लाकड़ा चीरीया, आप बणायो खेल ॥

धणी मारा आवजो वारु.....

आप दया कर आप पधारो, आपरो है संसार । (२)

परसण हो कर पाप कूं मेटो, सांभळो सिरजनहार ॥

धणी मारा आवजो वारु.....

अनोपस्वामी आप सरुपी, पृथ्वी में प्रकाश । (२)

सोनी हरिचन्द दुर्बल दाख्रे, आपरी मोरे आस ॥

धणी मारा आवजो वारु.....

राग-रासड़ा भजन-४

जाली लोक दूर हो जासी, पृथ्वी पर फूल प्रकाशी ।
हो जाली लोक दूर हो जासी, पृथ्वी पर फूल प्रकाशी ॥ टेर ॥

बावने राजा अविछल रेवजो, रेवजो बोयंतर खान । (२)
एक मने थी पाप तजो तो, वदसी आतम ज्ञान ॥
जाली लोक दूर हो जासी.....

जाजम राली चौक में ओ जद, आवसी बावन राव । (२)
खान राजेश्वर देख सौदागर, खेलसी पीछे दाव ॥
जाली लोक दूर हो जासी.....

बहु फुलेला पृथ्वी ओ जद, चेतसी आलम आप । (२)
मार जालियां कूं दूर हटावी, मेटसी गुपत पाप ॥
जाली लोक दूर हो जासी.....

जीत होसी दोय दीन की ओ जद, खपसी जाली जंद । (२)
जालियां संदी कामणी खपे, जदी मटेला फंद ॥
जाली लोक दूर हो जासी.....

सुख होसी संसार में ओ जद, गावसी मंगलासार । (२)
प्रेम सरुपी पंच भेला वे, बांधसी धरम पाल ॥
जाली लोक दूर हो जासी.....

अनोपस्वामी पूरण मलिया, मुगती रा मेलाण । (२)
सोनी हरिचन्द गावे गरीबो, आगम रा सेलाण ॥
जाली लोक दूर हो जासी.....

राग-रासड़ा भजन-५

आज मांरे गुरुजी आया, वधावो प्रेम से गाया ।
 हो आज मांरे गुरुजी आया, वधावो प्रेम से गाया ॥ टेरे ॥

आप सरोदे गुरुजी आया, सुख्र में संपत लाये । (२)
 प्रेम करे गुरु पूजीये ओ, थांरा आतम देव जगाए ॥
 आज मांरे गुरुजी आया.....

मृदंग ताल पख्रावल वाजे, सर्ज करे नर नार । (२)
 रंग करे और मंगल गावे, संत बड़ा है दयाल ॥
 आज मांरे गुरुजी आया.....

जगत रुपी जाजम रालो, मन में करो उसाव । (२)
 अणबे खोज अलख्रजी पूजो, और पख्रालीजे पांव ॥
 आज मांरे गुरुजी आया.....

भाव सरुपी भोजन ज्यांरे, गागर थाल भराय । (२)
 प्रेम करे मांरा गुरुजी जीमे, अणबे नाद घोराय ॥
 आज मांरे गुरुजी आया.....

लूंग डोड़ा और पान सोपारी, पावते श्रीफल सांई । (२)
 प्रेम करे ने पूजजो ज्योरा, गुरुजी आतम मांही ॥
 आज मांरे गुरुजी आया.....

अनोपस्वामी देव सरुपी, आद कला दरसाय । (२)
 सोनी हरिचन्द शीश नमाया, आनन्द मंगल थाय ॥
 आज मांरे गुरुजी आया.....

राग-रासड़ा भजन-६

गुरुजी अनोप पाया, त्यागी ज्यांरे हाजर माया ।

हो गुरुजी अनोप पाया, त्यागी ज्यांरे हाजर माया ॥ टेरे ॥

अनोप तो एक अखंड रूपी, अनोप एकण रंग । (२)

बालक रूपी देश में खेले, अनोप चेतन संग ॥

गुरुजी अनोप पाया.....

चेतन ज्यांरे संग में खेले, कर समरणा सेल । (२)

सुन का शहेर में दीपक जोया, नित पुरीजे तेल ॥

गुरुजी अनोप पाया.....

पांच तत्व रो खेलणों ज्यांरे, तीन गुणों से वात । (२)

अनोप राम के संग में खेले, जुग में मंगल गाए ॥

गुरुजी अनोप पाया.....

नगरी में नारायण खेले, वाज रही घणघोर । (२)

अनोपस्वामी सेल रमाया, मारीया काल ने चोर ॥

गुरुजी अनोप पाया.....

ऐसा अनोप मन का सूर, चेतन ज्यांरा काम । (२)

प्रेम सरुपी प्रसन्न हुआ, जैसे नकलंग श्याम ॥

गुरुजी अनोप पाया.....

अनोपस्वामी पूरण मलिया, देखते सर्वेई रंग । (२)

सोनी हरिचन्द चैन कूं पाया, सतगुरो रे संग ॥

गुरुजी अनोप पाया.....

राग-रासड़ा भजन-७

सती लोक धरम कूं ध्यावे, हीरा घणा हेत सुं पावे ।
हो सती लोक धरम कूं ध्यावे, हीरा घणा हेत सुं पावे ॥ टेर ॥

सदा निरंजन देव कूं सेवो, आतम देव जगाए । (२)
प्रेम करे ने पूजिये ओ वीरा, मंसा मंगल गाए ॥
सती लोक धरम कूं ध्यावे.....

संत केवीजे सूरमा ओ, ज्यांरे तन में नहीं काल । (२)
नाम कूं झेल धरम कूं राखे, बांधते धरम पाल ॥
सती लोक धरम कूं ध्यावे.....

आद कला अंतर में जोयलो, ओलख्रो आतम रूप । (२)
आद स्वर्ग पृथ्वी जाणौ, ज्यां हुआ तपेश्वर भूप ॥
सती लोक धरम कूं ध्यावे.....

देवपुरी में देव निरंजन, देखलो खोल कपाट । (२)
नगरी में नारायण खेले, ज्यां मांडी जवेरी हाट ॥
सती लोक धरम कूं ध्यावे.....

टगसारां कारीगर ज्यांरे, नाम तणा व्यापार । (२)
हर हीरां कूं मोलवे जको, मालीक रो अधिकार ॥
सती लोक धरम कूं ध्यावे.....

अनोपस्वामी पूरण मलीया, पेस्ते माणक हीर । (२)
सोनी हरिचन्द दुरबल दाखे, मलिया आदु पीव ॥
सती लोक धरम कूं ध्यावे.....

राग-रासड़ा भजन-८

आदु सत धर्म झेलीजे, नशा तो नाम का कीजे ।
हो आदु सत धर्म झेलीजे, प्याला तो प्रेम का पीजे ॥ टेर ॥

बीज बांधो सत धर्म को झेलो, वचन पालो जी । (२)
काळ को मार वचन को बांधो, कबद टालोजी ॥
आदु सत धर्म झेलीजे.....

दुविधा छोड़ जोयलो दीपक, दिल से टाळो दोष । (२)
कायम की जीत करो कब्जे में, जद रेवेला जोश ॥
आदु सत धर्म झेलीजे.....

वारी अजरी में बजरी मिलावो, भजन रे परियाण । (२)
मन पकड़ मगन में रेवो, पद पावो निर्वाण ॥
आदु सत धर्म झेलीजे.....

प्रेम का पंथ में पगला रोपो, करो कब्जो सोफेर । (२)
शत्रु जीत आजाद में रेवो, रखो भजन की लहेर ॥
आदु सत धर्म झेलीजे.....

वारी सुन का शहेर में आप विराजे, राखो सुरत सदाई । (२)
वहां हीरा की ज्योत जलत है, कभी अंधेरा नांही ॥
आदु सत धर्म झेलीजे.....

अनोपस्वामी पूरण मिलिया, उलटाया ओमकार । (२)
सोनी हरिचन्द ध्यान स्वरूपी, बाज रिया रणुकार ॥
आदु सत धर्म झेलीजे.....

राग-खमास गुणेश भजन-१

आवोरा गणपतजी बाला दरशण दीजो देव । (२)
 दीपक धूप कपूर की आरती (२) सत से करुं सेव ॥
 स्वामी थारी सत से करुं सेव ।
 आवोरा गणपतजी बाला दरशण दीजो देव ॥ टेरे ॥

प्रथम गुणेश पूजु देवता आगल वाण । (२)
 क्रोड़ तेतीसा मे लाड़ला ओ धणी (२) आद गुरु परवाण गुणेशा आद गुरु परवाण ॥
 आवोरा गणपतजी बाला.....

पांच खड़ाउआं नेवर वाजे मुख मे बाजे वेण । (२)
 फिरता दीसो फूटरा ओ धणी (२) निरमल थारा नेण, गुणेशा निरमल थारा नेण ॥
 आवोरा गणपतजी बाला.....

त्रवणी में तिलक विराजे माथे मुगट मोर । (२)
 आरोधिया वेला आवजो ओ धणी (२) जाल दलो रा तोड़ गुणेशा जाल दलो रा तोड़ ॥
 आवोरा गणपतजी बाला.....

पांच सातों में खेलिया ओ धणी रमीया नवोई बार । (२)
 संत करे है विणती ओ धणी (२) अवरं रा अवतार गुणेशा अवरं रा अवतार ॥
 आवोरा गणपतजी बाला.....

सिद्धी-सिद्धी थारे पाय बिराजे, पूजते पंडित भूप । (२)
 चरणे आयोरी लाज रखीजे (२) गणपति घणरूप गुणेशा गणपति घणरूप ॥
 आवोरा गणपतजी बाला.....

अनोपस्वामी देव सरुपी म्होय बताई श्यान । (२)
 सोनी हरिचन्द गुणेश पूजीया (२) पार्वती सुतकान गुणेशा पार्वती सुतकान ॥
 आवोरा गणपतजी बाला.....

राग-खमास गुणेश पूजा भजन-२

आद गुणेशा अखंड रूपी भांग सरूपी तेज । (२)

अगर ऊपर आप को आसण (२) सुन में पोढ़ण सेज ।

अखंडी सुन में पोढ़ण सेज ।

आद गुणेशा अखंड रूपी भांग सरूपी तेज ॥ टेर ॥

प्रथम देव गजानन्द पूजु, आद गुणी अवतार । (२)

मूल तख्त पर आप बिराजो, (२) पूज रहे नर-नार अखंडी पूज रहे नर-नार ॥

आद गुणेशा अखंड रूपी.....

आद बीजग में आपको जनम, आद का है उपदेश । (२)

आद एरण पे सुरती दीजे (२) गुण में है गुणेश अखंडी गुण में है गुणेश ॥

आद गुणेशा अखंड रूपी.....

अगनी वाय आकाश पृथ्वी जल, पांच की पूरण सोल । (२)

सूरती राखे देखे द्वादस, (२) चढ़णा पीली पोल अखंडी चढ़णा पीली पोल ॥

आद गुणेशा अखंड रूपी.....

अला पीगला सुख्रमण सोजो, पांच कूं लावो ठोर । (२)

त्रवणी में कर बांध पांचो कूं, (२) सांधलो गगन डोर अखंडी सांधलो गगन डोर ॥

आद गुणेशा अखंड रूपी.....

स्वास समरणा नाम निशानी, धीरज पांच धराय । (२)

त्रवणी महेल में गुणेश परसीया, (२) अणबे नाद घोराय अखंडी अणबे नाद घोराय ॥

आद गुणेशा अखंड रूपी.....

अनोपस्वामी गुण कूं पूजिया, साजिया सरवेई काज । (२)

सोनी हरिचन्द गुणेश पूजिया, (२) आद गुरु महाराज अखंडी आद गुरु महाराज ॥

आद गुणेशा अखंड रूपी.....

राग-खमास टोपी भजन-३

गुण की टोपी ग्यान से सीवो, नाम की चाले सुई १ (२)

उलट सुलट तार मिलावो (२) रटले तुई-तुई, ग्यानी भाई रटले तुई-तुई १

गुण की टोपी ग्यान से सीवो नाम की चाले सुई ॥ टेर ॥

गुण की टोपी ग्यान से सीवो बांधलो दसुई द्वार १ (२)

नासका सुई कूं नेण से जोय के (२) पोयले भीतर तार, ग्यानी भाई पोयले भीतर तार ॥

गुण की टोपी ग्यान से सीवो.....

गुण रजो गुण, गुण तमो गुण, गुण सतो गुण तीन १ (२)

सांद बराबर सीवतां देखीया (२) जद आयो आकीन, ग्यानी भाई जद आयो आकीन ॥

गुण की टोपी ग्यान से सीवो.....

पीला लीला धागा श्याम सफेदा पांचमा लालम लाल १ (२)

सुरती राखे फेर पांचा कूं (२) देख टोपी को ख्याल, ग्यानी भाई देख टोपी को ख्याल ॥

गुण की टोपी ग्यान से सीवो.....

अण टोपी के असतर जोयलो परदे लालम टूल १ (२)

तीन पांचो कूं मेल बराबर (२) लायो अर फूल, ग्यानी भाई लायो अर फूल ॥

गुण की टोपी ग्यान से सीवो.....

दोय पीला दोय लाल सफेदा दोय लीला एक श्याम १ (२)

नव तारो की निर्गुण टोपी (२) पेरते आतम राम, ग्यानी भाई पेरते आतम राम ॥

गुण की टोपी ग्यान से सीवो.....

अनोपस्वामी टोप कूं पेरिया, पेरिया आतम जोय १ (२)

सोनी हरिचन्द सीवली टोपी (२) ॐ सो ॐ सुई दोय,

ग्यानी भाई ॐ सो ॐ सुई दोय ॥

गुण की टोपी ग्यान से सीवो.....

राग-खमास कालमार भजन-४

ऐसा है समशेर शिकारी काल कूं मारे वोई । (२)

अंत से अगनी नाम से जागी (२) जलती देखी सेई, कालीगारी जलती देखी सेई ।

ऐसा है समशेर शिकारी काल कूं मारे वोई ॥ टेर ॥ (२)

आर संतों की सील संतों की काम संतों की कंथ । (२)

नाम संतों की काल कूं रोके (२) सोई केवीजे संत सुरावीर सोई केवीजे संत ॥

ऐसा है समशेर शिकारी

वारी नाम दीपक से जोयलो नगर कहां बसे तेरा काल । (२)

घट सरासर खेलाता देख्या (२) क्या बूढ़ा क्या बाल, सुरावीर क्या बूढ़ा क्या बाल ॥

ऐसा है समशेर शिकारी

मन घोड़ा तन त्राजणा ज्यांरे सील हुआ असवार । (२)

तीन पांचों कूं संग में लिया (२) घेरिया दसोई द्वार, सुरावीर घेरिया दसोई द्वार ॥

ऐसा है समशेर शिकारी

सैल बांध्या सत नाम का ज्यांरे घोर ले गुगर माल । (२)

पछम घाटी रोक लीनी जद (२) कोपण लागो काल, सुरावीर कोपण लागो काल ॥

ऐसा है समशेर शिकारी

वाग वचन पकड़ ले पूरा चढ़ले सोवन पाज । (२)

ललकारी कर मार ले काल कूं (२) जीत ले नगर राज, सुरावीर जीत ले नगर राज ॥

ऐसा है समशेर शिकारी

अनोपस्वामी काल कूं मारा, मन को लिया जीत । (२)

सोनी हरिचन्द बाण को फैकिया (२) नाम तणी प्रतीत, सुरावीर नाम तणी प्रतीत ॥

ऐसा है समशेर शिकारी

राग-खमास पृथ्वी परीयाण भजन-५

ओ धणी कूं भूलणा नही, अणमें बोले साईं ।
 भीतर बाहर दम को देखो, अन्दर बाहर जोत परखलो
 आगम बेगम तुईं निरंजन आगम वेगम तुईं ।
 ओ धणी कूं भूलणा नही, अणमें बोले साईं ॥ टेर ॥

पृथ्वी आदू देव केवीजे, पृथ्वी पीले रूप । (२)
 अण पृथ्वी में देवता रमे, (२) अण पृथ्वी में भूप निरंजन अण पृथ्वी में भूप ॥
 ओ धणी कूं भूलणा नही, अण में बोले साईं.....

अण पृथ्वी में घोर पड़े है, अण पृथ्वी में गाज । (२)
 अण पृथ्वी में वाजा वाजे, (२) अण पृथ्वी में राज निरंजन अण पृथ्वी में राज ॥
 ओ धणी कूं भूलणा नही, अण में बोले साईं.....

अण पृथ्वी में रमते खेलते, अण में मंगल गाये । (२)
 अण पृथ्वी में वावते लणते, (२) अण पृथ्वी में पाये निरंजन अण पृथ्वी में पाय ॥
 ओ धणी कूं भूलणा नही, अण में बोले साईं.....

अण पृथ्वी में मानव मोरा, अण पृथ्वी में जीव । (२)
 अण पृथ्वी में लख चौरासी, (२) पृथ्वी आदु पीव निरंजन पृथ्वी आदु पीव ॥
 ओ धणी कूं भूलणा नही, अण में बोले साईं.....

आ पृथ्वी कूदरत से बणी, अण में पांचोई तंत । (२)
 अण में तीनोई गुण वसत है, (२) सांभलो साधु संत निरंजन सांभलो साधु संत ॥
 ओ धणी कूं भूलणा नही, अण में बोले साईं.....

अनोपस्वामी पूरण मलिया, दिया वचन बाण । (२)
 सोनी हरिचन्द प्रेम से गाया, (२) पृथ्वी रा परीयाण निरंजन पृथ्वी रा परीयाण ॥
 ओ धणी कूं भूलणा नही, अण में बोले साईं.....

राग-खमास पृथ्वी सरग भजन-६

प्रेम से पूरी फेरलो माला हेत से हीरो पाई ।
 पीले गटागट देख्र दमोदम (२) आद की माला आई ।
 संतो भाई आद की माला आई ॥
 प्रेम से पूरी फेरलो माला हेत से हीरो पाई ॥ टेर ॥

स्वर्गलोक आ पृथ्वी जोयलो, जोयलो वैकुण्ठ आई । (२)
 पछे आद निरंजन देव कूं सेवो, (२) ॐ से करो उपाई संतो भाई ॐ से करो उपाई ॥
 प्रेम से पूरी फेर लो माला हेत से हीरो पाई.....

आद कला कूं याद करिजे, अंतर में ओळ्ख्राई । (२)
 काल क्रोध कूं मार हटालो, (२) मकर ने मस्ताई संतो भाई मकर ने मस्ताई ॥
 प्रेम से पूरी फेर लो माला हेत से हीरो पाई.....

संत केबीजे सूरमा ओ ज्यांरे, काल न दीसे कांई । (२)
 नाम पकड़ के देख्र दया कूं, (२) आतम पाल बधाई संतो भाई आतम पाल बधाई ॥
 प्रेम से पूरी फेर लो माला हेत से हीरो पाई.....

देवपुरी में देव निरंजन, देख्रलो ज्योत जगाई । (२)
 ज्यां हीरा संदी हाट मंडाणी,(२) जोयलो नगर जाई संतो भाई जोयलो नगर जाई ॥
 प्रेम से पूरी फेर लो माला हेत से हीरो पाई.....

टगसारो कारीगर ज्यांरे, लाख्रा लेवण आई । (२)
 हर हीरा कूं देख्र सुरत से,(२) मूंगे मोल बिकाई संतो भाई मूंगे मोल बिकाई ॥
 प्रेम से पूरी फेर लो माला हेत से हीरो पाई.....

अनोपस्वामी देव सरूपी, हीरदे हीर बताई । (२)
 सोनी हरिचन्द फेरली माला, (२) आतम में ओळ्ख्राई संतो भाई आतम में ओळ्ख्राई ॥
 प्रेम से पूरी फेर लो माला हेत से हीरो पाई.....

राग-खमास जोगाराम भजन-७

प्रीत सरूपी परस अखंडी देही में देवत वोही । (२)

नाभ से उलट देख सूरत से (२) जगत रूपी जोई, संतो भाई जगत रूपी जोई ।

प्रीत सरूपी परस अखंडी देही में देवत वोही ॥ टेर ॥

आद से उगम देख कूदरती, मालिक मंडप मांही । (२)

मूल को बांध के छेद शिखर कूं, (२) पवन डोर में पोई, संतो भाई पवन डोर में पोई ॥

प्रीत सरूपी परस अखंडी.....

रोपले नेजा नाभ के ऊपर, हेत से हाजर होई । (२)

खेल बाजीगर चढ़े शिखर पे, (२) आद को भजन ओई, संतो भाई आद को भजन ओई ॥

प्रीत सरूपी परस अखंडी.....

पांच नदुरी पांच बाजीगर, करलो खबर कोई । (२)

मृदंग ताल को मन बजावत, (२) नदुआ नासण ताई, संतो भाई नदुआ नासण ताई ॥

प्रीत सरूपी परस अखंडी.....

पांच नदुरी पूरिया आसण, सुगम सील संजोई । (२)

पांच बाजीगर खेल रचायो, (२) देखण आया दोए, संतो भाई देखण आया दोए ॥

प्रीत सरूपी परस अखंडी.....

चढ़ीया शील शिखर के ऊपर, घोर पड़े घट मांही । (२)

सुन का शहेर में रास रचायो, (२) मलिया आतम साई, संतो भाई मलिया आतम साई ॥

प्रीत सरूपी परस अखंडी.....

अनोपस्वामी रास रचायो खेल बतायो मोई

सोनी हरिचन्द शील सरूपी, (२) देखलो दरशण सोई, संतो भाई देखलो दरशण सोई ॥

प्रीत सरूपी परस अखंडी.....

राग-देशी सरगुणी भजन-१

वारी चेत सको तो चेतो, थारे शील धरम रा वोतो । (२)

जणसुं बंधण छूटे, वे पगवी आवे पूटे ओ जी जी ॥ टेरे ॥

वारी जनम लिया भवजुग में, थारे बंधन पड़िया पग में । (२)

वारी कहो किसीवद छूटे, वे पगवी आवे पूटे ओ जी जी ॥

वारी चेत सको तो चेतो.....

वारी जाय ओ जनम थारो वीतो, थे हरी भजन को जीतो । (२)

थारे कबद बांधलो खूटे, वे पगवी आवे पूटे ओ जी जी ॥

वारी चेत सको तो चेतो.....

वारी आद कला नही जाणी, वो भटकत फिरे अड़ाणी । (२)

ज्यारे अकल कसीवद उटे, वे पगवी आवे पूटे ओ जी जी ॥

वारी चेत सको तो चेतो.....

वारी भेख भेद वण गावे, वो मरदंग ताल बजावे । (२)

कोई लकड़ खालड़ी कूटे, ज्यारे पगवी आवे पूटे ओ जी जी ॥

वारी चेत सको तो चेतो.....

कोई धरम नाम में जूता, ज्यारे जख मारे जमदूता । (२)

कोई बोल वचन के झूटे, ज्यारे पगवी आवे पूटे ओ जी जी ॥

वारी चेत सको तो चेतो.....

वारी अनोपदास गुरु पाया, जणे आद भेद ओळखाया । (२)

सोनी हरिचन्द ज्ञान घुटे, सतगुरु से बंधन छूटे ओ जी जी ॥

वारी चेत सको तो चेतो.....

राग-देशी निरगुण भजन-२

वारी देव कला दरसीजे ज्यांरे परम ज्योत परसीजे । (२)
ज्यां चढे शिखर पर आया ज्यां गुरु गुणपती धाया ओ जी जी ॥ टेर ॥

वारी समरु ओ सरस्वत मांडई, थे सरब गुणों सुखदाई । (२)
वारी आसण पदम चढाया, ज्यां गुरु गुणपती धाया ओ जी जी ॥
वारी देव कला दरसीजे.....

वारी नाभ कमल से जागी, वो डोर गगन से लागी । (२)
वटे नरभे थम्ब ठेहराया, ज्यां गुरु गुणपती धाया ओ जी जी ॥
वारी देव कला दरसीजे.....

वारी उलट चढे कोई वादी, ज्यांरे छूटे जाल उपाधी । (२)
वारी चढके शंख्र बजाया, ज्यां गुरु गुणपती धाया ओ जी जी ॥
वारी देव कला दरसीजे.....

वारी अला पींगला आवे, ज्यां सुख्रमण वेंण बजावे । (२)
ज्यां सुरती तार मिलाया, ज्यां गुरु गुणपती धाया ओ जी जी ॥
वारी देव कला दरसीजे.....

वारी नटु वरत पर नाचे, ज्यां ब्रह्म वेद कूं वांचे । (२)
ज्यां धणी तख्त पर आया, ज्यां गुरु गुणपती धाया ओ जी जी ॥
वारी देव कला दरसीजे.....

वारी सतगुरु अनोपदासजी, जणे ब्रह्म समाधि साजी । (२)
वारी सोनी हरिचन्द गाया, ज्यां गुरु गुणपती धाया ओ जी जी ॥
वारी देव कला दरसीजे.....

राग-विहाग भजन-१

वारी भेद कूदरती, देख्रो मगज में (२) समरो स्वास उसासा जी जी ।
वारी दिलका देव, देख्रलो तन कर (२) आठ पहोर उजासा जी जी ॥ टेर ॥

वारी धरणी आद, सरब गुण रचिया (२) पग-पग गुण परकाशा जी जी ।
वारी ज्यो की कला, सकल में दरसे (२) रचिया सब रंग रासा जी जी ॥
वारी भेद कूदरती, देख्रो मगज में.....

वारी धरणी रूप, कसीवद दरसे (२) कणवद वे बरदासा जी जी ।
वारी सातोई कमल, तत्व गुण जोवो (२) जद आवे विश्वासा जी जी ॥
वारी भेद कूदरती, देख्रो मगज में.....

वारी हद का थंब, गगन सूं मेलो (२) ज्यां निरंजन का वासा जी जी ।
वारी सुरा वेसो, सनमुख्र चाले (२) कायर रा पग पासा जी जी ॥
वारी भेद कूदरती, देख्रो मगज में.....

वारी सूरु वीर, शिखर गढ चढीया (२) घेरीया नगर नगासा जी जी ।
वारी धरणी रूप, जगत कर जोया (२) पूरी मन सब आशा जी जी ॥
वारी भेद कूदरती, देख्रो मगज में.....

वारी पांडव पांच, भजन का पूरा (२) ज्यांरा देव गुरु दुरवासा जी जी ।
वारी धरणी रा गुण, पांडवे जोया (२) नित रखते नरमासा जी जी ॥
वारी भेद कूदरती, देख्रो मगज में.....

वारी आप अनोप, धरण गुण धाया (२) रटते मासा मासा जी जी ।
वारी सोनी हरिचन्द, शीश नमाया (२) जुग जरणी का दासा जी जी ॥
वारी भेद कूदरती, देख्रो मगज में.....

राग-विहाग भजन-२

वारी हरका होए, हजूरी छाजे (२) वो सागर में तरता जी जी ।
वारी विकरम करे, वगत नहीं जोवे (२) फट थुलो संग फरता जी जी ॥ टेरे ॥

वारी करणी करे, कबद नहीं मेले (२) पर तरीया संग रळता जी जी ।
वारी भीतर गांट, भरम नहीं तुटे (२) कबद काळ से मरता जी जी ॥
वारी हरका होए, हजूरी छाजे.....

वारी मद माटी, पेट विष भरिया (२) नीत पाप में धरता जी जी ।
वारी गुरु हीण, वचन का वेरी (२) झूठ काल से झरता जी जी ॥
वारी हरका होए, हजूरी छाजे.....

वारी अवगुण छोड़, देव गुण लेवे (२) सुद-बुद अंग में भरता जी जी ।
वारी दिल में दया, रेण दिन ज्यां के (२) दुष्ट काल से डरता जी जी ॥
वारी हरका होए, हजूरी छाजे.....

वारी नेसल हुए, नाम गुण रटीयो (२) दम दम पेरी चढ़ता जी जी ।
वारी पांच पचीस, तीन गुण आदु (२) दम गुण सब वहां मिलता जी जी ॥
वारी हरका होए, हजूरी छाजे.....

वारी अण घर देवा, अलख्र अख्राड़ो (२) नित नूर ज्यां वरता जी जी ।
वारी अज अविनासी, अलख्र बिराजे (२) विस्ला दरशण करता जी जी ॥
वारी हरका होए, हजूरी छाजे.....

वारी आप अनोप, गुण का सागर (२) गुण देख्यो मन ठरता जी जी ।
वारी सोनी हरिचन्द, वणज चलाया (२) वण एरण गुण घड़ता जी जी ॥
वारी हरका होए, हजूरी छाजे.....

राग-विहाग भजन-३

वारी नाव धरम की, जण सुं चाले (२) ज्यांरा खेवटिया किरतारा जी जी ।

वारी दिल दरियाव, चलावो जगत कर (२) जद लांघो भव पारा जी जी ॥ टेरे ॥

वारी उतपत आद, तंत तिरगुण में (२) जल अग्नि जुग सारा जी जी ।

वारी सरब जून ज्यांरे, दम सब घट में (२) वायु तंत विस्तारा जी जी ॥

वारी नाव धरम की, जण सुं चाले.....

वारी विक्रम पाप, तोड़ दो तनसुं (२) मारो सीग मजारा जी जी ।

पछे दम की माला, फेरलो दम से (२) दम से जो दिदारा जी जी ॥

वारी नाव धरम की, जण सुं चाले.....

वारी निरमल होए, निरंजन भेटो (२) खोलो देव द्वारा जी जी ।

वारी अण देवल में, अखंडी देवा (२) अधर ज्योत निराकारा जी जी ॥

वारी नाव धरम की, जण सुं चाले.....

वारी सुरता-नुरता, करे मुख आगे (२) ज्यांरा ब्रह्मादेव भरतारा जी जी ।

वारी रमझम पांव, घुंघरूं बाजे (२) वटे झालर रा झणकारा जी जी ॥

वारी नाव धरम की, जण सुं चाले.....

वारी बाजा अजब, बजे गढ़ भीतर (२) रण-रण राम रणुकारा जी जी ।

पछे दमकी डोर, सुगम चढ़ जोया (२) वटे उरस पुरुष दीदारा जी जी ॥

वारी नाव धरम की, जण सुं चाले.....

वारी अनोपदास गुरु, वेद उपाया (२) लिखिया गुण हीरदाराजी ।

वारी सोनी हरिचन्द, गुरु गम पाया (२) देख धरम की धारा जी जी ॥

वारी नाव धरम की, जण सुं चाले.....

राग-विहाग भजन-४

वारी मन कूं मारे, होए मर जीवा (२) पकड़ो समझ सबूरा जी जी ।

वारी निरंजन देव, नूर में दरसे (२) वाजे अणहद तुरा जी जी ॥ टेरे ॥

वारी सरस्वत मांडै, सदा गुण गावुं (२) भजन देवो भरपूरा जी जी ।

वारी गणपत स्वामी, महा घणनामी (२) काल कपट कर दूरा जी जी ॥

वारी मन कूं मारे, होए मर जीवा.....

वारी भोलप किया, भगत नही वाजो (२) एतो काम करूरा जी जी ।

वारी पद निस्वाणी, नाम उचारो (२) जद पावो पद पूरा जी जी ॥

वारी मन कूं मारे, होए मर जीवा.....

वारी नाभी थरन, पांच तुरगुण में (२) हरदम हेर हजुरा जी जी ।

वारी स्वासे स्वास, उलट कर समरो (२) राखो हिम्मत घर दूरा जी जी ॥

वारी मन कूं मारे, होए मर जीवा.....

वारी दुविधा दोषण, दूर कर दिलसु (२) मेटो फेल फितुरा जी जी ।

वारी सतगुरु कही, सूरत को बांधो (२) दरसे ज्योत जरूरा जी जी ॥

वारी मन कूं मारे, होए मर जीवा.....

वारी जण धाया जण, सेजे पाया (२) गाज बीज घण-घोरा जी जी ।

वारी निरगुण रूप, देख देवल में (२) राज तेज रंग रूड़ा जी जी ॥

वारी मन कूं मारे, होए मर जीवा.....

वारी आप अनोप, परम पद पाया (२) ज्यारे केवल नाम सदुरा जी जी ।

वारी सोनी हरिचन्द, भजन विचारे (२) रटीया नही मगरूरा जी जी ॥

वारी मन कूं मारे, होए मर जीवा.....



अनूप मण्डल वालों की तरफ से
जगत के भक्तजनों को राम राम ।
इतिश्री

● प्रकाशक ●

श्री अनूपस्वामीजी महाराज की झुंपडी

नकलंग धाम, झुण्डाल

सरदार पटेल रिंग रोड, नकलंग चौक,

मु. पो. झुण्डाल, जि. गाँधीनगर (गुज.)